



東坡詩鈔

蘇軾字子瞻一字和仲眉州山人嘉祐二年進士調

福昌主簿對制策入三等除大理評事簽書鳳翔府判

官入判登聞鼓院召試直史館丁父憂熙寧二年還朝

判官告院權開封府推官出判杭州知密徐湖三州以

為詩謗訕逮赴臺獄謫黃州團練副使安置築室於東

坡自號東坡居士移常州哲宗立復朝奉郎知登州召

為禮部郎中遷起居舍人尋除翰林學士兼侍讀拜龍

圖閣學士出知杭州召為翰林承旨數月知穎州揚州

復召為兵部尚書兼侍讀改禮部兼端明殿翰林侍讀

兩學士出知定州紹聖初貶寧遠軍節度副使惠州安

置又貶瓊州別駕居儋耳徽宗立移舒州團練副使徙

東坡詩鈔

永州更三赦遂提舉玉局觀復朝奉郎建中靖國元年

卒于常州年六十六南渡後贈太師謚文忠子瞻詩氣

象洪濶鋪叙宛轉子美之後一人而已然用事太多不

免失之豐縟雖其學問所溢要亦洗削之功未盡也而

世之訾宋詩者獨於子瞻不敢輕議以其胸中有萬卷

書耳不知子瞻所重不在此也加之梅溪之註鬪釘其

間則子瞻之精神反為所掩故讀蘇詩者汰梅溪之註

并汰其過於豐縟者然後有真蘇詩也

辛丑十一月十九日既與子由別於鄭州西門之外

馬上賦詩一篇寄之

不飲胡為醉兀兀此心已逐歸鞍發歸人猶自念庭闈今
我何以慰寂寞登高回首坡隴隔惟見烏帽出復沒苦寒

念爾衣裘薄，獨騎瘦馬踏殘月。路人行歌居人樂，僮僕怪我苦悽惻。亦知人生要有別，但恐歲月去飄忽。寒燈相對記疇昔，夜雨何時聽蕭瑟。君知此意不可忘，慎勿苦愛高官職。嘗有夜雨對床之言，故云爾。

病中大雪數日未嘗起觀，號令趙薦以詩相屬，戲用

其韻答之

經旬卧齋閣，終日親劑和。不知雪已深，但覺寒無奈。飄蕭

窅紙鳴，堆壓簷板障。閣中皆以板爲簷。風颭助凝冽，幃幔困掀簸。

惟患近醇醲，未敢窺瓌瑳。嗟何時反炎赫，却欲躬白磨。誰云

座無臠，尚有裘充貨。西鄰歌吹發，促席寒威挫。崩騰踏成

逕，繚繞飛入坐。人歡瓦先融，飲僞餅屢卧。嗟余獨愁寂，空

室自困坷。欲爲後日賞，恐被遊塵泥。寒更報新霽，皎月懸

東坡詩鈔

二

半破有客獨，苦吟清夜默。自課詩人例，窮蹇秀句出。寒餓何當暴，雪霜庶以躡。郊賀

歲晚相與餽，問爲餽歲酒。食相邀呼爲別歲，至除夜達

且不眠爲守歲。蜀之風俗如是。余官岐下，歲暮思歸而

不可得，故爲此三詩寄子由。

餽歲

農功各已收，歲事得相佐。爲歡恐無具，假物不論貨。山川隨出產，貧富稱小大。宜盤巨鯉橫，發籠雙兔卧。富人事華靡，綵繡光翻座。貧者餽不能，微擎出春磨。官居故人少，里巷佳節過。亦欲舉鄉風，獨侶無人和。

別歲

故人適千里，臨別尚遲遲。人行猶可復，歲行那可追。問歲

安所之遠在天一涯已逐東流水赴海歸無時東鄰酒初
熟西舍莢亦肥且爲一日歡慰此窮年悲勿嗟舊歲別行
與新歲辭去去勿回顧還君老與衰

守歲

欲知垂盡歲有似赴壑蛇脩鱗已半沒去意誰能遮况欲
繫其尾雖勤知奈何兒童強不睡相守夜謹譚晨雞且勿
唱更鼓畏添樹坐久燈燼落起看北斗斜明年豈無年心
事恐蹉跎弩力盡今夕少年猶可誇

和子由踏青

春風陌上鶯微塵遊人初樂歲華新人開正好路旁飲麥
短未怕遊車輪城中居人厭城郭喧闐曉出空四鄰歌鼓
驚山草木動輦瓢散野鳥鳶馴何人聚衆稱道人遮道賣

東坡詩鈔

三

符色怒曠宜蠶使汝蠶如甕宜畜使汝羊如麇路人未必
信此語強爲買服禳新春道人得錢徑沽酒醉倒自謂吾
符神

和子由蠶市

蜀人衣服常苦艱蜀人遊樂不知還千人耕種萬人食一
年辛苦一春閑閑時尚以蠶爲市共忘辛苦逐欣歡去年
霜降斫秋荻今年箔積如連山破瓢爲輪土爲釜爭買不
翅金與紉憶昔與子皆童卯年年廢書走市觀市人爭誇
鬪巧智野人喑啞遭欺謾詩來使我感舊事不悲去國悲
流年

和子由論書

吾雖不善書曉書莫如我苟能通其意常謂不學可貌妍

容有顰蹙美何妨
楷端莊雜流麗剛健含婀娜好之每自
譏不謂子亦頗書成輒棄去繆被旁人裹體勢本濶畧結
束入細麼子詩亦見推語重未敢荷邇來又學射力薄愁
官笥官箭十二把吾能十一把箭耳多好竟無成不精安用夥何當盡屏
去萬事付懶惰吾聞古書法守駿莫如跛世俗筆苦驕衆
中強鬼馱鍾張忽已遠此語與時左

和子由寒食

寒食今年二月晦
樹林深翠已生煙
遠城駿馬誰能借到
處名園意盡便
但挂酒壺那計盞
偶題詩句不須編
忽聞啼鴉驚羈旅
江上何人治廢田

石鼓

冬十二月歲辛丑
我初從政見魯叟
舊聞石鼓今見之
文

東坡詩鈔

四

字鬱律蛟蛇走細觀
初以指畫肚欲讀嗟如箱
在口韓公好古生已遲
我今况又百年後
強尋偏旁推點畫
時得一

二遺八九我車既攻馬亦同
其魚維鱖貫之柳其詞云我馬既同又云其魚維何維鱖維鯉何以貫之惟揚與柳惟此六句可讀餘多不可通古器縱橫猶識

鼎衆星錯落僅名斗
糗糊半已似癡脈詰曲猶能辨
跟肘娟娟缺月隱雲霧
濯濯嘉禾秀莖莠漂流百戰
偶然存獨立千載誰與友
上追軒頡相唯諾下揖冰斯
同穀穀憶昔周宣歌鴻雁
當時籀史變蝌蚪厭亂人方思
聖賢中興天爲生耆耆東征徐闕
虓虎北伏隨指喉象骨雜沓

貢狼鹿方邵聯翮賜圭卣
遂因鼓鞞息將帥豈爲考擊煩
矇眊何人作頌比崧高
萬古斯文齊响嘯動勞至大不矜
伐文武未遠猶忠厚欲尋年歲無
甲乙豈有名字記誰某

自從周衰更七國竟使秦人有九有掃除詩書誦法律投棄俎豆陳鞭撻當年何人佐祖龍上蔡公子牽黃狗登山刻石頌功烈後者無繼前無偶昔云皇帝巡四國烹滅強暴救黔首六經旣已委灰塵此鼓亦當遭擊剗傳聞九鼎淪泗上欲使萬夫沉水取暴君縱欲窮人力神物義不汙秦垢是時石鼓何處避無乃天公令鬼守興亡百變物自閉富貴一朝名不朽細思物理多歎息人生安得如汝壽

王維吳道子畫

何處訪吳畫普門與開元開元有東塔摩詰留手痕吾觀畫品中莫如二子尊道子實雄放浩如海波翻當其下手風雨快筆所未到氣已吞亭亭雙林間彩暈扶桑暎中有至人談寂滅悟者悲涕迷者手自捫蠻君鬼伯千萬萬相排競進頭如鼉摩詰本詩老佩芷蘼芳蓀今觀此壁畫亦若其詩清且敦祇園弟子盡鶴骨心如死灰不復溫門前雨叢竹雪節貫霜根交柯亂葉動無數一一皆可尋其源吳生雖妙絕猶以畫工論摩詰得之於象外有如仙翻謝籠樊吾觀二子皆神俊又於維也歛衽無間言

東湖

吾家蜀江上江水綠如藍爾來走塵土意思殊不堪况當岐山下風物尤可慙有山禿如楮有水濁如泔不謂郡城東數步見湖潭入門便清奧恍如夢西南泉源從高來隨波走涵涵東去觸重阜盡爲湖所貪但見蒼石螭開口吐清甘借汝腹中過胡爲日耽耽新荷弄晚涼輕棹極幽探飄風忘遠近偃息遺佩蓂深有龜與魚淺有螺與蚌曝晴

復戲雨戢戢多於蠶浮沉無停餌倏忽遽滿籃絲繆雖強

致瑣細安足戡聞昔周道興翠鳳棲孤嵐飛鳴飲此水照

影弄甍甍此古飲鳳池也至今多梧桐合抱如彭聃綵羽無復見

上有鷗搏鶻嗟予生雖晚考古意所矧圖書已漫患猶復

訪僑郟卷阿詩可繼此意久已含扶風古三輔政事豈汝

諳聊為湖上飲一縱醉後談門前遠行客劫劫無留膠問

胡不回首無乃趨朝叅予今正疎懶官長幸見函不辭日

遊再行恐歲滿三暮歸還倒載鐘鼓已齟齬音誦

李氏園 李茂正園也合為其氏所有

朝遊北城東回首見脩竹下有朱門家破墻圍古屋舉鞭

叩其戶幽響答空谷入門所見夥十步九移目異花兼四

方野鳥喧百族其西引溪水活活轉墻曲東注入深林林

東坡詩鈔

深窓戶綠水光兼竹淨時有獨立鷓林中百尺松歲久蒼

鱗感豈惟此地少意恐關中獨小橋過南浦夾道多喬木

隱如城百雉挺若舟千斛陰陰日光淡黯黯秋氣蓄盡東

為方池野雁雜家鶯紅梨驚合抱映島孤雲覆春光水溶

漾雪陣風翻撲其北臨長溪波聲捲平陸北山卧可見蒼

翠間磴禿我時來周覽問此誰所築云昔李將軍負嶮乘

衰叔抽錢算間口但未榷羹粥常時奪民田失業安敢哭

誰家美園圃籍沒不容贖此亭破千家鬱鬱城之麓將軍

竟何事蟻蝨生刀韉何嘗載美酒來此駐車轂空使後世

人聞名頸猶縮俗猶呼皇后園蓋我今官正閑屢至因休

沐人生營居止竟為何人卜何當辦一身永與清景逐

秦穆公墓

豪泉在城東墓在城中無百步乃知昔未有此城秦人以
泉識公墓昔公生不誅孟明豈有死之日而忍用其良乃
知三子殉公意亦如齊之二子從田橫古人感一飯尚能
殺其身今人不復見此等乃以所見疑古人古人不可望
今人益可傷

七月二十四日以久不雨出禱磻溪是日宿號縣二
十五日晚自號縣渡渭宿於僧舍曾閣閣故曾氏
所建也夜久不寐見壁有前縣令趙薦留名有懷

其人

龕燈明滅欲三更歌枕無人夢自驚深谷留風終夜響亂
山銜月半牀明故人漸遠無消息古寺空來有姓名欲向
磻溪問姜叟僕夫屢報斗杓傾

東坡詩鈔

七

和子由記園中草木四首

煌煌帝王都赫赫走羣彥嗟汝獨何爲閉門觀物變微物
豈足觀汝獨觀不劬牽牛與葵蓼採摘入詩卷吾聞東山
傅置酒攜嬾婉富貴未能忘聲色聊自遣汝今又不然時
節看瓜蔓懷寶自足珍藝蘭那計晚吾歸於汝處慎勿嗟
歲晚

荒園無數畝草木動成林春陽一已敷妍醜各自矜蒲萄
雖滿架困倒不能任可憐病石榴花如破紅襟葵花雖粲
粲蒂淺不勝簪叢蓼晚可喜輕紅隨秋深物生感時節此
理等廢興飄零不自由盛亦非汝能

萱草雖微花孤秀自能拔亭亭亂葉中一一芳心插牽牛
獨何畏詰曲日牙蘂走尋荆與榛如有宿昔約南齋讀書

處清翠曉如潑偏工貯秋雨歲歲壞籬落

我歸自南山山翠猶在心目隨白雲去夢繞山之麓汝從何方來笑齒粲如玉探懷出新詩秀語奪山綠覺來已茫

昧但記說秋菊有如採樵子入洞聽琴筑歸來寫遺聲猶

勝人間曲八月十一日夜宿府學方和此詩夢與弟遊南山出詩數十篇夢中甚愛之及覺唯記一句云

蟋蟀悲秋菊

北寺

唐初傳有此亂後不留碑良虎關門早無村得米遲山泉自入甕野桂不勝炊信美那能久應先學忍飢

自仙遊回至黑水見居民姚氏山亭高絕可愛復憇

其上

山鷓曉辭谷似報遊人起出門猶屢顧慘若去吾里道途

東坡詩鈔

八

險且迂繼此復能幾溪邊有危構歸駕聊復柅愛此山中人縹渺如仙子平生慕獨往官爵同一屣胡爲此谿邊眷眷若有埃國恩久未報念此慙且泚臨風浩悲吒萬世同一軌何年謝簪紱丹砂留迅晷

竹颺

野人獻竹颺腰腹大如盎自言道旁得採不費置罔鳴夷讓圓滑混沌慙瘦爽兩牙雖有餘四足僅能髣逢人自驚蹶罔若兒脫襁念茲微陋質刀几安足枉就禽太倉卒羞愧不能饗南山有孤熊擇獸行祇掌

漢陂魚 陂在鄆縣

霜筠細破爲雙掩中有長魚如卧劍紫荇穿腮氣慘悽紅鱗照坐光磨因攜來雖遠鬣尚動烹不待熟指先染坐客

相看爲解顏香粳飽送如填塹早歲嘗爲荆渚客黃魚屢
食沙頭店濱江易採不復珍盈尺輒棄無乃憊自從西征
復何有欲致南烹嗟久欠游儻瑣細空自腥亂骨縱橫動
遭砭故人遠餽何以報客俎久空驚忽瞻東道無辭信使
頻西鄉幸有庖鑿

十二月十四日夜微雪明日早往南谿小酌至晚

南谿得雪真無價走馬來看及未消獨自披榛尋履迹最
先犯曉過朱橋誰憐破屋眠無處坐覺村飢語不烹惟有
暮鴉知客意驚飛片片落寒條

九月中曾題小詩於南溪竹上旣而忘之昨日再遊
見而錄之

湖上蕭蕭疎雨過山頭靄靄暮雲橫陂塘水落荷將盡城
東坡詩鈔

市人歸虎欲行

司竹監燒葦園因召都巡檢柴貽昂左藏以其徒會

獵園下

官園刈葦歲留槎深冬放火如紅霞枯槎燒盡有根在春
雨一洗皆萌芽黃狐老兔最狡捷賣侮百獸常矜誇年年
此厄竟不悟但愛蒙密爭來家風迴焙捲毛尾熱欲出已
被蒼鷹遮野人來言此最樂徒手曉出歸滿車巡邊將軍
在近邑呼來颯颯從矛戈戍兵久閑可小試戰鼓雖疎猶
堪颯雄心欲搏南澗虎陣勢頗學常山蛇霜乾火烈聲爆
野飛走無路號且呀迎人截來若逢箭避火逸去窮投置
擊鮮走馬殊未厭但恐落日催棲鷗弊旗仆數坐數獲鞍
挂雉兔有分慶主人置酒聚狂客紛紛醉辭晚更譁燎毛

燔肉不暇割飲啗直欲追義媧青丘雲夢古所賦與此何
啻百倍加苦遭諫疏說夷羿又被賦客嘲溼脊豈如閑官
走山邑放曠不與趨朝衙農工已畢歲暮幸騎雖少賓
殊佳酒酣上馬去不告獵獵霜風吹帽斜

和子由木山引水

蜀江久不見滄浪江上枯槎遠可將去國尚能二犢載汲
泉何愛一夫忙崎嶇好事人應笑冷淡爲歡意自長遙想
納涼清夜永窓前微月照汪汪

和董傳留別

麤繒大布裹生涯腹有詩書氣自華厭伴老儒烹瓠葉強
隨舉子踏槐花囊空不辦尋春馬眼亂行看擇壻車得意
猶堪誇世俗詔黃新濕字如鴉

東坡詩鈔

十

次韻子由綠筠堂

愛竹能延客求詩刺挂牆風梢千蠹亂月影萬夫長谷鳥
驚暮響山蜂識酒香只應陶靖節會聽北窓涼

送錢藻出守婺州得英字

老手便劇郡高懷厭承明聊紆東陽綬一濯滄浪纓東陽
佳山水未到意已清過家父老喜出郭壺漿迎子行得所
願愴恨居者情吾君方急賢日盱坐邇英黃金招樂毅白
璧賜虞卿子不少自貶陳義空嶒嶻古稱爲郡樂漸恐煩
敲榜臨分敢不盡醉語醒還驚

送劉道原歸觀南康

晏嬰不滿六尺長高節萬仞陵首陽青衫白髮不自歎富
貴在天那得忙十年閉戶樂幽獨百金購書收散亡榻來

東觀弄丹墨聊借舊史誅姦強孔融不肯下曹操汲黯本
自輕張湯雖無尺箠與寸刃口吻排擊含風霜自言靜中
閱世俗有似不飲觀酒狂衣巾狼藉又屢舞傍人大笑供
子場交朋翩翩去畧盡惟我與子猶傍徨世人共棄君獨
厚豈敢自愛恐子傷朝來告別驚何速歸意已逐征鴻翔
匡廬先生古君子挂冠兩紀髯未蒼定將文度置滕上喜
動鄰里烹猪羊君歸爲我道姓字幅巾他日容登堂

傅堯俞濟源草堂

微官共有田園興老罷方尋隱退廬栽種成陰十年事舍
皇求買萬金無先生卜築臨荷濟喬木如今似畫圖鄰里
亦知偏愛竹春來相與護龍籬

和柳子玉過陳絕糧次韻

東坡詩鈔

十一

如我自觀猶可厭非君誰復肯相尋圖書跌宕悲年老燈
火青熒語夜深早歲便懷齊物意微官敢有濟時心南行
十里成何事一聽秋濤萬鼓音

泗州僧伽塔

我昔南行舟繫汴逆風三日沙吹面舟人共勸禱靈塔香
火未收旗脚轉回頭頃刻失長橋却到龜山未朝飯至人
無心何厚薄我自懷私欣所便耕田欲雨刈欲晴去得順
風來者怨若使人入禱輒遂造物應須日千變我今身世
兩悠悠去無所逐來無戀得行固願留不惡每到有求神
亦倦退之舊云三百尺澄觀所營今已換不嫌俗士汙丹
梯一看雲山遶淮甸

龜山

我生飄蕩去何求再過龜山歲五周身行萬里半天下僧
卧一庵初白頭地隔中原勞北望潮連滄海欲東遊元嘉
舊事無人記故壘摧頽今在不宋文帝遣將拒魏太武築城此山

十月十六日記所見

風高月暗水雲黃淮陰夜發朝山陽山陽曉霧如細雨烟
烟初日寒無光雲收霧卷已亭午有風北來寒欲僵忽驚
飛雹穿戶牖迅駛不復容遮防市人顛沛百賈亂疾雷一
聲如頽墻使君來呼晚置酒坐定已復日照廊倪疑所見
皆夢寐百種變怪旋消亡共言蛟龍厭舊穴魚鼈隨徙空
陂塘愚儒無知守章句論說黑白推何样惟有主人言可
用天寒欲雪飲此觴

遊金山寺

東坡詩鈔

十二

我家江水初發源宦遊直送江入海聞道潮頭一丈高天
寒尚有沙痕在中冷南畔石盤隘古來出沒隨濤波試登
絕頂望鄉國江南江北青山多羈愁畏晚尋歸棹山僧苦
留看落日微風萬頃靴文細斷霞半空魚尾赤是時江月
初生魄二更月落天深黑江心似有炬火明飛焰照山樓
鳥驚悵然歸卧心莫識非鬼非人竟何物江山如此不歸
山江神見怪驚我頑我謝江神豈得已有田不歸如江水
是夜所見如此

自金山放船至焦山

金山樓觀何耽耽撞鐘擊鼓聞淮南焦山何有有脩竹採
薪汲水僧雨三雲靈浪打入迹絕時有沙戶祈春蠶我來
金山更留宿而此不到心懷慙同遊盡返決獨往賦命窮

薄輕江潭清晨無風浪自湧中流歌嘯倚半酣老僧下山
驚客至迎笑喜作巴人談自言久客忘鄉井只有彌勒爲
同龕困眠得就紙帳暖飽食未厭山蔬甘山林飢卧古亦
有無田不退寧非貪禽雖未三見黥叔夜自知七不堪
行當投劾謝簪組爲我佳處留茆庵

吳人謂水中可田者
爲沙焦山長老中江
人也

次韻子由柳湖感物

憶昔子美在東屯數間茆屋蒼山根朝吟草木調蠻獠欲
與猿鳥爭啾喧子今樵悴衆所棄驅馬獨出無往還惟有
柳湖萬株柳清陰與子供朝昏胡爲譏評不少借生意凌
挫難爲繁柳雖無言不解愠世俗乍見應慚然嬌姿其愛
春濯濯豈問空腹脩虵蟠朝看濃翠傲炎赫夜愛疎影搖

東坡詩鈔

十三

清圓風翻雪陣春絮亂蠹響啄木秋聲堅四時盛衰各有
態搖落淒愴驚寒温南山孤松積雪底抱凍不死誰復賢

戲子由

宛丘先生長如丘宛丘學舍小如舟常時低頭誦經史忽
然欠伸屋打頭斜風吹帷雨注面先生不愧傍人羞任從
飽死笑方朔肯爲雨立求秦優眼前勃磈何足道處置六
鑿須天遊讀書萬卷不讀律致君堯舜知無術勸農冠蓋
閒如雲送老鹽齏甘似蜜門前萬事不挂眼頭雖長低氣
不屈餘杭別駕無功勞畫堂五丈容旂旄重樓跨空雨聲
遠屋多人少風騷騷平生所慙今不耻坐對疲氓更鞭箠
道逢陽虎呼與言心知其非口諾唯居高志下真何益氣
節消縮今無幾文章小技安足程先生別駕舊齊名如今

衰老俱無用付與時人分重輕

吉祥寺賞牡丹

人老簪花不自羞花應羞上老人頭醉歸扶路人應笑十
里珠簾半上鉤

六月二十七日望湖樓醉書

黑雲翻墨未遮山白雨跳珠亂入船卷地風來忽吹散望
湖樓下水如天

放生魚鱉逐人來無主荷花到處開水枕能令山俯仰風
船解與月裴回

烏菱白芡不論錢亂繫青菰裹綠盤忽憶嘗新會靈觀滯
留江海得加餐

東坡詩鈔

十四

兒不識楚詞招

未成小隱聊中隱可得長閑勝暫閑我本無家更安往故
鄉無此好湖山

夜泛西湖二絕

蒼龍已沒半斗橫東方芒角昇長庚漁人收篙及未曉船
過惟有菰蒲聲

湖上禁漁皆盜釣者也

湖光非鬼亦非仙風恬浪靜光滿川須臾兩兩入寺去就
視不見空茫然

監試呈諸試官

我本山中入寒苦益寸廩文詞雖少作勉強非天稟既得
旋廢忘懶惰今十稔麻衣如再著墨水真可飲每聞科詔
下白汗如流瀉此邦東南會多士敢題品芻蕘盡蘭蓀香

不數葵萑貧家見珠貝眩晃自難審緬懷嘉祐初文格變
已甚千金碎全壁百衲收寸錦調和椒桂臘咀嚼沙礫礮
廣眉成半額學步歸蹕踈維時老宗伯氣壓羣兒稟蛟龍
不世出魚鮪初驚滄至音久乃信知味猶食棗至今天下
士微管幾左衽謂當千載後石室祠高朕爾來又一變此
學初誰諗權衡破舊法芻豢笑凡飪高言追衛樂篆刻鄙
曹沈先生周孔出弟子淵騫寢却顧老鈍軀頑朴謝鐫銀
諸君況才傑容我懶且噤聊欲廢書眠秋濤諠午枕

望海樓晚景二絕

海上濤頭一線來樓前相顧雪成堆從今潮上君須上更
看銀山二十回

青山斷處塔層層隔岸人家喚欲磨江上秋風晚來急爲

東坡詩鈔

十五

傳鐘鼓到西輿

試院煎茶

蟹眼已過魚眼生颺颺欲作松風鳴蒙茸出磨細珠落眩
轉遶甌飛雪輕銀瓶瀉湯誇第二未識古人煎水意

水不煎茶君不見昔時李生好客手自煎貴從活火發新泉又

不見今時潞公煎茶學西蜀定州花瓷琢紅玉我今貧病
長苦飢分無玉盃捧娥眉且學公家作茗飲搏爐石銚行
相隨不用撐腸挂腹文字五千卷但願一甌常及睡足日

高時

孫莘老求墨妙亭詩

蘭亭繭紙入昭陵世間遺迹猶龍騰顏公變法出新意細
筋入骨如秋鷹徐家父子亦秀絕字外出力中藏稜嶧山

傳刻典刑在千載筆法留陽水杜陵評書貴瘦硬此論未
公吾不憑短長肥瘠各有態玉環飛燕誰敢憎吳興太守
真好古購買斷缺揮縑緇龜跌入坐螭隱壁空齋書靜聞
登登奇蹤散出走吳越勝事傳說誇友朋書來乞詩要自
寫爲把栗尾書谿藤後來視今猶視昔過眼百世如風燈
他年劉郎憶賀監還道同時須伏膺

是日宿水陸寺寄北山清順僧二首

草沒河堤雨暗村寺藏脩竹不知門拾薪煮藥憐僧病掃
地燒香淨客魂農事未休侵小雪佛燈初上報黃昏年來
漸識幽居味息與高人對榻論

長嫌鐘鼓聒湖山此境蕭條却自然乞食遶村真爲飽無
言對客本非禪披榛覓路衝泥入洗足關門聽雨眠遙想
後身窮賈島夜寒應聳作詩肩

東坡詩鈔

十六

將之湖州戲贈莘老

餘杭自是山水窟玄開吳興更清絕湖中橘林新著霜溪
上茗花正浮雪顧渚茶芽白於齒梅溪水瓜紅勝頰吳兒
鱸縷薄欲飛未去先說饒涎垂亦知謝公到郡久應怪杜
牧尋春遲髻絲只好對禪榻湖亭不用張水嬉

鴉種麥行

霜林老鴉閑無用畦東拾麥畦西種畦西種得青猗猗畦
東已作牛毛稀明年麥熟芒攢粲農夫未食鴉先啄徐行
俛仰若自矜鼓翅跳踉上牛角憶昔舜耕歷山鳥爲耘如
今老鴉種麥更辛勤農夫羅拜鴉飛起勸農使者來行水

和致仕張郎中春晝

投綬歸來萬事輕，消磨未盡祇風情。舊因蓴菜求長假，新爲楊枝作短行。不禱自安緣壽骨，苦藏難沒是詩名。淺斟盃酒紅生頰，細琢歌詞穩稱聲。蝸殼卜居心自放，蠅頭寫字眼能明。盛衰閱過君應笑，寵辱年來我亦平。跪履數從圯下老，逸書閑問濟南生。東風屈指無多日，祇恐先春鶗鴂鳴。

冬至日獨遊吉祥寺

井底微陽回未回，蕭蕭寒雨濕枯荂。何人更似蘇夫子，不是花時肯獨來。

吳中田婦歎 和賈收韻

今年粳稻熟苦遲，庶見霜風來幾時。霜風來時雨如瀉，把頭出箇鎌生衣。眼枯淚盡雨不盡，忍見黃穗卧青泥。茆苦一月隴上宿，天晴獲稻隨車歸。汗流肩頰載入市，價賤乞與如糠粃。賣牛納稅折屋炊，慮淺不及明年飢。官今要錢不要米，西北萬里招羗兒。龔黃滿朝人更苦，不如却作河伯婦。

東坡詩鈔

十七

遊道場山何山

道場山頂何山麓，上徹雲峰下幽谷。我從山水窟中來，尚愛此山看不足。陂湖行盡白漫漫，青山忽作龍蛇盤。山高無風松自響，誤認石齒號驚湍。山僧不放山泉出，屋底清池照瑤席。堦前合抱香入雲，月裏仙人親手植。出山回望翠雲鬟，碧瓦朱欄縹緲間。白水田頭問行路，小溪深處是何山高入讀書夜。達旦至今山鶴鳴，夜半我今廢學不歸山。山中對酒空三歎。

贈莘老

嗟余與子久離羣耳冷心灰百不聞若對青山談世事當
須舉白便浮君

天目山前深浸裾碧闌堂下看銜鱸作堤捍水非吾事閑
送茗溪入太湖

夜來雨洗碧嶼吮浪湧雲屯遶郭寒聞有弁山何處是爲
君四面竟來看

夜橋燈火照溪明欲放扁舟取次行覓借官奴遣吹笛明
朝新月到三更

三年京國厭藜蒿長羨淮魚壓楚糟今日駱駝橋下泊恣
看脩網出銀刀

秀州報本禪院鄉僧文長老方丈

東坡詩鈔

十八

萬里家山一夢中吳音漸已變兒童每逢蜀叟談終日便
覺峨眉翠掃空師已忘言真有道我除搜句百無功明年
采藥天台去更欲題詩滿浙東

宋叔達家聽琵琶

數絃已品龍香撥半面猶遮鳳尾槽新曲翻從玉連瓊舊
聲終愛鬱輪袍夢回只記歸舟字賦罷雙垂紫錦絛何異
烏孫送公主碧天無際雁行高

法惠寺橫翠閣

朝見吳山橫暮見吳山縱吳山故多態轉側爲君容幽人
起朱閣空洞更無物惟有千步岡東西作簾額春來故國
歸無期人言悲秋春更悲已泛平湖思濯錦更看橫翠憶
娥眉凋欄能得幾時好不獨憑欄人易老百年興廢更堪

哀懸知草莽化池臺游人尋我舊游處但覓吳山橫處來
有以官法酒見餉者因用前韻求述古爲移厨飲湖

上

喜逢門外白衣人欲贈湖中赤玉鱗遊舫已粧吳榜穩舞
衫初試越羅新欲將魚釣追黃帽未要靴刀抹絳巾芳意
十分強半在爲君先踏水邊春

飲湖上初晴後雨二首

朝曦迎客艷重岡晚雨留人入醉鄉此意自佳君不會一
盃當屬水仙王

湖上有水仙王廟

水光瀲灩晴方好山色空濛雨亦奇欲把西湖比西子淡
粧濃抹總相宜

風水洞和李節推

東坡詩鈔

十九

風轉鳴空穴泉幽瀉石門虛心聞地籟妄意覓桃源過客
詩難好居僧語不繁歸併得水雪清冷慰文園

新城道中

東風知我欲山行吹斷簷間積雨聲嶺上晴雲披絮帽樹
頭初日挂銅鉦野桃含笑竹籬短溪柳自搖沙水清西崦
人家應最樂煮芹燒筍餉春耕

山村

煙雨濛濛雞犬聲有生何處不安生但教黃犢無人佩布
穀何勞也勸耕

老翁七十自腰鎌慙愧春山笱蕨甜豈是聞韶解忘味爾
來三月食無鹽

杖藜裹飯去匆匆過眼青錢轉手空贏得兒童語音好

年強半在城中

贈別

青鳥銜巾久欲飛黃鸞別主更悲啼慙慙莫忘分攜處湖
水東邊鳳嶺西

於潛女

青裙縞袂於潛女兩足如霜不穿屨簷沙鬢髮絲穿牀蓬
沓障前走風雨老滌官旌傳父祖至今遺民悲故主茗溪
楊柳初飛絮照溪畫眉渡溪去逢郎樵歸相媚嫵不信姬
姜有齊魯

僧清順新作垂雲亭

江山雖有餘亭榭苦難穩登臨不得要萬象各偃蹇惜哉
垂雲軒此地得何晚天功爭向背詩眼巧增損路窮朱欄

東坡詩鈔

二十

出山破石壁狼海門浸坤軸湖尾抱雲嶽葱蔥城郭麗淡
淡煙村遠紛紛鳥鵲去一一漁樵返雄觀快新獲微景收
昔道道人真古人嘯吟慕嵇阮空齋卧蒲褐芒屨每自捫
天憐詩人窮乞與供詩本我詩久不作荒澁旋鉏墾從君
覓佳句咀嚼廢朝飯

會客有美堂周郊長官與數僧同泛湖往北山湖中

聞堂上歌笑聲以詩見寄因和

載酒無人過子雲掩關晝卧客書裙歌喉不共聽珠貫醉
面何因作纈紋僧侶且陪香火社詩壇欲飲鶴鵝軍憑君
徧遶湖邊寺漲淥晴來已十分

追和子由去歲試舉人落下所寄詩暴雨初晴樓上

晚景

秋後風光雨後山滿城流水碧潏潏煙雲好處無多子及
取昏鴉未到間

洛邑從來天地中嵩高蒼翠北邙紅風流耆舊消磨盡只

有青山對病翁

謂富公也

白汗翻漿午景前雨餘風物便蕭然應須半熟鵝黃酒照
見新晴水碧天

病中遊祖塔院

謂富公也

紫李黃瓜村路香烏紗白葛道衣涼閉門野寺松陰轉歛
枕風軒客夢長因病得閑殊不惡安心是藥更無方道人
不惜塔前水借與匏樽自在嘗

與述古自有美堂乘月夜歸

娟娟雲月稍侵軒漱漱星河半隱山魚鑰未收清夜永鳳

東坡詩鈔

二十一

蕭猶在翠微間凄風瑟縮經絃柱香霧淒迷着鬢鬟共喜
使君能鼓樂萬人爭看火城還

八月十五看潮

萬人鼓噪颯吳儂猶似浮江老阿童欲識潮頭高幾許越
山渾在浪花中

宿九仙山

九仙謂左元放許邁王謝之流

風流王謝古仙真一去空山五百春玉室金堂餘漢土桃
花流水失秦人困眠一榻香凝帳夢遶千巖冷逼身夜半
老僧呼客起雲峰缺處湧水輪

初自筵

山歸述古召飲介亭以病先起

西風初作十分涼喜見新橙透甲香遲暮賞心驚節物登
臨病眼怯秋光慣眠處士雲庵裏倦醉佳人錦瑟旁猶有

夢迴清興在 卧聞歸路樂聲長

九日尋臻閣梨遂泛小舟至慙師院

湖上青山翠作堆 葱鬱鬱氣佳哉 笙歌叢裏拙身出 雲水光中洗眼來 白足赤髭迎我笑 拒霜黃菊爲誰開 明年桑芋煎茶處 憶著衰翁首重迴

韻然有九日與陸羽煎茶詩羽自號桑芋翁余來年九日去此久矣

次韻述古過周長官夜飲

二更鏡鼓動諸鄰 百首新詩問八珍 已遣亂蛙成兩部 更邀明月作三人 雲煙湖寺家家鏡 燈火沙河夜夜春 曷不勸公勤秉燭 老來光景似奔輪

述古以詩見責屢不赴會復次前韻

我生孤癖本無鄰 老病年來益自珍 肯對紅裙辭白酒 但

東坡詩鈔

二十一

愁新進笑陳人 北山怨鶴休驚夜 南畝中車欲及春 多謝

清詩屢推設 豨膏那解轉方輪

來詩有雲霄滿輪之句

書雙竹湛師房

暮鼓朝鐘自擊撞 閉門孤枕對殘缸 白灰旋撥通紅火 卧聽蕭蕭雪打窓

和錢安道寄惠建茶

我官于南今幾時 嘗盡溪茶與山茗 胸中似記故人面 口不能言心自省 爲君細說我未暇 試評其畧羞可聽 建溪所產雖不同 一一天與君子性 森然可愛不可慢 骨清肉膩和且正 雪花雨脚何足道 啜過始知真味永 縱復苦硬終可錄 汲黯少恣寬 饒猛草茶無賴空 有名高者妖邪次 頑穢體輕 雖復強浮泛 性滯偏工嘔 酸冷其間絕品豈不

佳張禹縱賢非骨鯁
花玉鞞不易致
道路幽嶮隔雲嶺
誰知使者來自西
開緘磊落收百飭
嗅香嚼味本非別
透紙自覺光炯炯
粃糠團鳳友小龍
奴隸日注臣雙井
收藏愛惜待佳客
不敢包裹鑽權倖
此詩有味君勿傳
空使時人怒生癩

和柳子玉喜雪次韻仍呈述古

詩翁愛酒長如渴
餅盡欲沽囊已竭
燈青火冷不成眠
一夜撚鬚吟喜雪
詩成就我寬歡處
我窮正與君髣髴
曷不走投陳孟公有
酒醉君仍飽德瓊
瑤欲盡天應惜更
遣清光續殘月安得
佳人擢素手笑捧
玉盃兩奇絕豔歌
一曲
起陽春坐使高堂
生暖熱

夜至永樂文長老院文時卧病退院

東坡詩鈔

二十三

愁聞巴叟卧荒村
來打三更月下門
往事過年如昨日
此生未死得重論
老非懷上情相得
病不開堂道益尊
惟有孤栖舊時鶴
舉頭見客似長言

除夜野宿常州城外二首

行歌野哭兩堪悲
遠火低星漸向微
病眼不眠非守歲
鄉音無伴苦思歸
重衾脚冷知霜重
新沐頭輕感髮稀
多謝殘燈不嫌客
孤舟一夜許相依

南來三見歲云徂
直恐終身走道塗
老去怕看新曆日
退歸擬學舊桃符
煙花已作青春意
霜雪偏尋病客鬚
但把窮愁博長健
不辭最後飲屠蘇

常潤道中有懷錢塘寄述古

草長江南鶯亂飛
年來事事與心違
花開後院還空落
燕

入華堂怪未歸世上功名何日是樽前點檢幾人非去年
柳絮飛時節記得金籠放雪衣

梳人以放鶴爲太守壽

浮玉山頭日日風

卽金山也

湧金門外已春融二年魚鳥渾相

識三月鶯花付與公剗看新翻眉倒暈未應泣別臉消紅
何人織得相思字寄與江邊北向鴻

惠泉山下土如濡陽羨溪頭米勝珠賣劔買牛吾欲老殺
雞爲黍子來無地偏不信容高蓋俗儉真堪着腐儒莫怪
江南苦留滯經營身計一生迂

遊鶴林招隱二首

郊原雨初霽春物有餘妍古寺滿脩竹深林聞杜鵑睡餘
柳花墮目眩山櫻然西窓有病客危坐看香煙

行歌白雲嶺坐咏脩竹林風輕花自落日薄山半陰澗草

東坡詩鈔

二十四

誰復識聞香杳難尋時見城市人幽居惜未深

次韻沈長官

造物知吾久念歸似憐衰病不相違風來震澤帆初飽雨
入松江水漸肥

過永樂文長老已卒

初驚鶴瘦不可識旋覺雲歸無處尋三過門間老病死一
彈指頃去來今存亡慣見渾無淚鄉井難忘尚有心欲向

錢塘訪圓澤葛洪川畔待秋深

捕蝗至浮雲嶺山行疲苦有懷子由弟

霜風漸欲作重陽熠熠溪邊野菊黃久廢山行疲犖确尚
能村醉舞淋浪獨眠林下夢魂好回首人間憂患長殺馬
毀車從此逝子來何處問行藏

與毛令方尉遊西菩提寺二首

推擠不去已三年魚鳥依然笑我頑人未放歸江北路天
教看盡浙西山尚書清節衣冠後處士風流水石間一笑
相逢那易得數詩狂語不須刪

路轉山腰足未移水清石瘦便能奇白雲自古東西嶺
月誰分上下池黑黍黃粱初熟後朱柑綠橘半甜時人生
此樂須天賦莫遣兒曹取次知

雪夜書北臺壁二首

黃昏猶作雨纖纖夜靜無風勢轉嚴但覺衾裯如潑水不
知庭院已堆鹽五更曉色來書幌半夜寒聲落畫簷試掃
北臺看馬耳未隨埋沒有雙尖

東坡詩鈔

二十五

搖銀海眩生花遺蝗入地應千尺宿麥連雲有幾家老病
自嗟詩力退空吟冰柱憶劉叉

謝人見和前篇二首

已分酒盃欺淺懦敢將詩律鬪深嚴漁簑句好應須畫柳
絮才高不道鹽敗屨尚存東郭指飛花又舞謫仙簷書生
事業真堪笑忍凍孤吟筆退尖

九陌凄風戰齒牙銀杯逐馬帶隨車也知不作堅牢玉無
奈能關頊刻花得酒強歡愁底事閉門高卧定誰家臺前
日暖君須愛水下寒魚漸可叉

遊廬山次韻章傳道

塵容已似服轅駒野性猶同縱壑魚出入巖巒爭切表較
量筋力十年初雖無窈窕驅前馬還有鴟夷挂後車莫笑

吟詩淡生活當今阿買爲君書

惜花

吉祥寺中錦千堆錢塘花最盛處前年賞花真盛哉道人勸我清
明來腰鼓百面如春雷打徹涼州花自開沙河塘上插花
回醉倒不覺吳兒哈豈知如今雙鬢催城西古寺沒蒿萊
有僧閉門手自栽千枝萬葉巧剪裁就中一叢何所似馬
腦盤成金縷杯而我食菜方清齋對花不飲花應猜夜來
雨雹如李梅紅殘綠暗吁可哀

送春

和子由

夢裏青春可得追欲將詩句絆餘暉酒闌病客惟息睡蜜
熟黃蜂亦懶飛芍藥櫻桃俱掃地病過此物鬢絲禪榻兩忘
機憑君借取法界觀一洗人間萬事非來書云近有此書余未嘗見也

東坡詩鈔

二十六

孔長源挽詞

小偃門頭柳繫船吳山堂上月侵窺潮聲夜半千巖響詩

句明朝萬口傳

長源自越過松夜飲有美堂上聯句長源稱善

豈意日斜庚子後忽驚歲在巳辰年佳城一閉無窮

事南望題詩淚灑牋

懷西湖寄晁美叔同年

西湖天下景遊者無愚賢深淺隨所得誰能識其全嗟我
本狂直早爲世所捐獨專山水樂付與寧非天三百六十
寺幽尋遂窮年所至得其妙心知口難傳至今清夜夢耳
日餘芳鮮君持使者節風采爍雲煙清流與碧巖安肯爲
君妍胡不屏騎從甞借僧榻眠讀我壁間詩清涼先頰煎
策杖無道路直造意所便應逢古漁父葦間自黃緣問道

若有得買魚勿論錢

和蔣夔寄茶

我生百事常隨緣四方水陸無不便扁舟渡江適吳越三年飲食窮芳鮮金齏玉膾飯炊雪海螯江柱初脫泉臨風飽食甘寢罷一甌花乳浮輕圓自從捨舟入東武沃野便到桑麻川翦毛胡羊大如馬誰記鹿角腥盤筵厨中蒸粟埋飯甕大杓更取酸生涎拓羅銅碾棄不用脂麻白土須盆研故人猶作舊眼看謂我好尚如當年沙溪北苑強分別水脚一線爭誰先清詩兩幅寄千里紫金百餅費萬錢吟哦烹噍兩奇絕只恐偷乞煩封纏老妻稚子不知愛一半已入薑鹽煎人生所遇無不可南北嗜好知誰賢死生禍福久不擇更論甘苦爭蚩妍知君窮旅不自釋因詩寄

謝聊相鐫

次韻周邠寄雁蕩山圖

西湖三載與君同馬入塵埃鶴入籠東海獨來看出日石橋先去踏長虹遙知別後添華髮時向樽前說病翁所恨蜀山君未見他年攜手醉耶筒

送碧香酒與趙明叔教授

聞君有婦賢且廉勸君慎勿爲楚相不羨紫駝分御食自遣赤脚沽村釀嗟君老狂不知愧更吟醜婦惡嘲謗諸生聞語定失笑冬暖號寒卧無帳碧香近出帝子家鵝兒破殼酥流盜不學劉伶獨自飲一壺往助齊眉餉

趙旣見和復次韻答之

長安小吏天所放日夜歌呼和丞相豈知後世有阿瞞

自言參之後

北海樽前提私釀先生未出禁酒國詩語孤高常
近謗幾回無酒欲沽君却畏有司書簿帳近制公使酒過法甚重酸
寒可笑分一斗日飲如何足衰盜更將險語壓衰翁只恐
自是臺無餉

趙郎中往莒縣逾月而歸復以一壺遺之仍用原韻
東鄰主人遊不歸悲歌夜夜聞春相門前人鬪馬嘶急一
家喜氣如春釀王事何曾怨獨賢室人豈忍交謫謗大兒
踉蹌越門限小兒啞啞語繡帳定教舞袖掣伊涼更想夜
庖鳴甕盎題詩送酒君勿謂免使退之嘲一餉

劉貢父見余歌詞數首以詩見戲聊次其韻

十載漂然未可期那堪重作看花詩門前惡語誰傳去醉
後狂歌自不知刺舌君今猶未戒灸眉我亦更何辭相從
痛飲無餘事正是春容最好時

東坡詩鈔

二十八

次韻子由送蔣夔赴代州學官

功利爭先變法初典刑獨守老成餘窮人未信詩能爾倚
市懸知繡不如代北諸生漸狂簡牀頭雜說爲爬梳歸來
問雁吾何敢疾世王符解著書

和李邦直沂山祈雨有應

高田生黃埃下田生蒼耳蒼耳亦已無更問麥有幾蛟龍
睡足亦解慙二麥枯時雨如洗不知雨從何處來但聞呂
梁百步聲如雷試上城南望城北際天菽粟青成堆飢火
燒腸作牛吼不知待得秋成否半年不雨坐龍慵其怨天
公不怨龍今朝一雨聊自贖龍神社鬼各言功無功日盜
太倉穀嗟我與龍同此責勸農使者不汝容因君作詩先

自刻

宿州次韻劉涇

我欲歸休惡漸希舞雩何日着春衣多情白髮三千丈無
用蒼皮四寸圍晚覺文章真小技早知富貴有危機爲君
垂涕君知否千古華亭鶴自飛

涇之兄泮亦有文死矣

次韻答邦直子由二首

簿書顛倒夢魂間知我疎慵肯見原閑竹閉門僧舍冷病
閒吹枕海濤喧忘懷杯酒逢人共引睡文書信手翻欲吐
狂言喙三尺怕君瞋我却須吞

邦直屢以此見戒

君雖爲我此遲留別後淒涼我已憂不見便同千里遠退
歸終作十年遊恨無楊子一區宅懶卧元龍百尺樓閒道
鷓鴣滿臺閣網羅應不到沙鷗

東坡詩鈔

二十九

中秋月

暮雲收盡溢清寒銀漢無聲轉玉盤此生此夜不長好明
月明年何處看

韓幹馬十四疋

二馬並驅攢八蹄二馬宛頸鬣尾齊一馬任前雙舉後一
馬却避長鳴嘶老髯奚官騎且顧前身作馬通馬語後有
八疋飲且行微流赴吻若有聲前者旣濟出林鶴後者欲
涉鶴俛啄最後一匹馬中龍不嘶不動尾搖風韓生畫馬
真是馬蘇子作詩如見畫世無伯樂亦無韓此詩此畫誰
當看

哭刁景純

讀書想前輩每恨生不早紛紛少年場猶得見此老此老

如松栢不受霜雪槁直從毫末中自養到合抱宏材乏近
用千歲自枯倒文章餘正始風節貫華皓平生爲人耳自
爲薄如縞是非雖難齊反覆看愈好前年旅吳越把酒慶
壽考扣門無晨夜百過迹未掃但知從德公未省厭丘嫂
別時公八十後會知難保昨日故人書連年喪公媪景純妻先
傷心范橋水漾漾舞寒藻華堂不見人瘦馬空戀早我
欲江東去匏樽酌行潦鏡湖無賀監慟哭稽山道忍見萬
松岡荒池沒秋草

答呂梁仲屯田

亂山合沓圍彭門官居獨在懸水村

呂梁地名

居民蕭條雜麋

鹿小市冷落無雞豚黃河西來初不覺但訝清泗流奔渾

夜聞沙岸鳴騫盜曉看雪浪浮鵬鯤呂梁自古喉吻地萬

東坡詩鈔

三十

頃一抔何由吞坐觀入市卷閭井吏民走盡餘王尊討窮
踏斷欲安適吟詩破屋愁鴛鴦躑躅歲寒霜重水歸壑但見屋
瓦留沙痕入城相對如夢寐我亦僅免爲魚鼈旋呼歌舞
雜談笑不惜飲醕空餅盆念君官舍冰雪冷新詩美酒聊
相溫人生如寄何不樂任使絳螭燒黃昏宣房未築淮泗
滿故道堙滅瘡痍存明年勞苦應更甚我當畚鍤先黥髡
付君萬指伐頑石千鎚雷動蒼山根高城如鐵洪口決談
笑却掃看崩奔農夫掉臂免狼顧秋穀布野如雲屯還須
更置軟脚酒爲君擊鼓行金樽

春菜

蔓菁宿根已生葉韭牙戴土拳如蕨爛烝香薺白魚肥碎
點青蒿涼餅滑宿酒初消春睡起細履幽畦掇芳辣茵蔯

甘菊不負渠繪縷堆盤纖手抹北方苦寒今未已雪底蒹
葭如鐵甲豈如吾蜀富冬蔬霜葉露牙寒更茁久拋菘葛
猶細事苦筍江豚那忍說明年投劫徑須歸莫待齒搖并
髮脫

讀孟郊詩二首

夜讀孟郊詩細字如牛毛寒燈照昏花佳處時一遭孤芳
擢荒穢苦語餘詩騷水清石鑿鑿湍激不受篙初如食小
魚所得不償勞又似煮彭蠡竟日嚼空齧要當關僧清未
足當韓蒙人生如朝露日夜火消膏何苦將兩耳聽此寒
蟲號不如且置之飲我玉卮膠

我憎孟郊詩復作孟郊語飢腸自鳴喚空壁轉飢鼠詩從
肺腑出出輒愁肺腑有如黃河魚出膏以自煮尚愛銅斗

東坡詩鈔

三十一

歌鄙俚頗近古桃弓射鴨罷獨速短策舞不憂踏船翻踏
浪不踏土吳姬霜雪白赤脚浣白紵嫁與踏浪兒不識離
別苦歌君江湖曲感我長鬕旅

約公擇飲是日大風

先生生長匡廬山中讀書三十年舊聞飲水師顏淵不
知治劇乃所便偷兒夜探赤白丸奮髯忽逢朱子元半年
羣盜誅七百誰信家書藏九千春風無事秋月閑紅粧執
樂豪且妍紫衫玉帶兩部全琵琶一抹四十絃客來留飲
不計錢齊人愛公如子產兒啼卧路呼不還我慙山郡空
留連牙兵部吏笑我寒邀公飲酒公無難約束官奴買花
鈿薰衣理髮夜不眠曉來顛風塵暗天我思其由豈坐慳
作詩愧謝公笑籬歸來瑟縮愈不安要當啖公八百里豪

氣一洗儒生酸

夜飲次韻畢推官

簿書叢裏過春風，酒聖時時且復中。
紅燭照庭嘶驥裏，黃雞催曉唱玲瓏。
老來漸減金釵典，醉後空驚玉筍工。
月上時應早散免，教教谷問吾公。

續麗人行

李仲謀家有周昉畫背而欠仲內人極精戲作此詩

深宮無人春日長，沉香亭北百花香。
美人睡起薄梳洗，燕舞鶯啼空斷腸。
畫工欲畫無窮意，背立東風初破睡。
若教回首却嫣然，陽城下蔡俱風靡。
杜陵飢客眼長寒，寒驢破帽隨金鞍。
隔花臨水時一見，只許腰支背後看。
心醉歸來茆屋底，方信人間有西子。
君不見孟光舉案與眉齊，何曾背面傷春啼。

東坡詩鈔

三十二

游張山人園

壁間一軸煙蘿子，盆裏千枝錦被堆。
慣與先生爲酒伴，不嫌刺史亦顏開。
纖纖入麥黃花亂，颯颯催詩白雨來。
聞道君家好井水，歸軒乞得滿甌回。

攜妓樂游張山人園

大杏金黃小麥熟，墮巢乳鵲拳新竹。
故將俗物惱幽人，細馬紅粧滿山谷。
提壺勸酒意雖重，杜鵑催歸聲更速。
酒闌人散却關門，寂歷斜陽掛疎木。

僕曩於長安陳漢卿家見吳道子畫佛碎爛可惜其

後十餘年復見之於鮮于子駿家則已裝背完好

子駿以見遺作詩謝之

貴入金多身復閑爭買書畫不計錢已將鐵石充逸少

鐵

石梁武帝時入今法帖更補朱繇爲道玄

世所收吳畫煙多朱繇筆也

薰屋漏裝玉軸鹿皮蒼壁知誰賢吳生畫佛本神授夢中

化作飛空僊覺來落筆不經意神妙獨到秋毫顛我昔長

安見此畫歎息至寶空潛然素絲斷續不忍看已作胡蝶

飛聯翩君能收拾爲補綴體質散落嗟神全志公髣髴見

刀尺脩羅天女猶雄妍如觀老杜飛鳥句脫字欲補知無

緣問君乞得良有意欲將俗眼爲洗前貴人一見定羞作

錦囊千紙何足捐不須更用博麻縷付與一炬隨飛煙

次韻答舒教授觀余所藏墨

異時長笑王會稽野鷺臙腥汗刀几莫年却得庾安西自
厭家雞題六紙二子風流冠當代顧與兒童爭愠喜秦王

東坡詩鈔

三十三

十八已龍飛嗜好晚將蚍蜉比我生百事不挂眼時人繆
說云工此世間有癖念誰無傾身障籠尤堪鄙一生當著
幾兩屐定心宥爲微物起此墨足支三十年但恐風霜侵
髮齒非入磨墨磨人併應未罄鬢先耻逝將振衣歸故
國數畝荒園自鉏理作書寄君君莫笑但覓來禽與青李
一螺黥漆便有餘萬竈燒松何處使君不見永寧第中擣
龍麝列屋閑居清且美倒暈連眉秀嶺浮雙鴉畫鬢香雲
委時開五斛賜蛾綠不惜千金求懶隨聞君此詩當大笑
寒窓冷硯水生水

中秋月三首

殷勤去年月激灑古城東憔悴去年人卧病破窓中徘徊
巧相覓窈窕穿房櫳月豈知我病但見歌樓空撫枕三歎

息扶杖起相從天風不相哀吹我落瓊宮白露入肝肺夜
吟如秋蟲坐令太白豪化為東野窮餘年知幾何佳月豈
屢逢寒魚亦不睡竟夕相殮嗚

六年逢此月五年照離別中秋有月凡六年矣惟
去歲與子由會於此歌君別

時曲滿坐爲淒咽留都信繁麗此會豈輕擲銀百頃湖

桂鏡千尋闕三更歌吹罷人影亂清颺歸來北堂下寒光

翻露葉喚酒與婦飲念我向兒說豈知衰病後空盞對梨

栗但見古河東麩麥如鋪雪欲和去年曲復恐心斷絕

舒子在汶上閉門相對清智煥賦舉
人鄆州鄭子向河朔鄭僅楚
北京戶

曹孤舟連夜行頓子雖咫尺尤如在牢局頓起來徐
試舉人趙子

寄書來水調有餘聲今日得趙果卿書備記余
東武中秋所作水調歌頭在悠哉四

子心共此千里明明月不解老良辰難合并回顧坐上人

東坡詩鈔

三十四

聚散如流萍嘗聞此宵月萬里同陰晴故人文生爲余言
嘗見海賈云中秋

有月則是歲殊多而團賈人嘗以此候之雖
相去萬里他日會合相問陰晴無不同者天公自著意

此會那可輕明年各相望俯仰今古情

和子由中秋見月

明月未出羣山高瑞光千丈生白毫一杯未盡銀闕涌亂

雲脫瓌如崩濤誰爲天公洗眸子應費明河千斛水遂令

冷看世間人顧我湛然心不起西南火星如彈丸角尾奕

奕蒼龍蟠今宵注眼看見更許螢火爭清寒何人艤舟

臨古汴千燈夜作魚龍變曲折無心逐浪花低昂赴節隨

歌板是夜賈客舟
中放水燈青燐滅沒轉前山浪颭風迴豈復堅明

月易低人易散歸來呼酒更重看堂前月色愈清好咽咽

寒蟬鳴露草卷簾推戶寂無人窓下啞啞惟楚老近有一
孫名楚

老南都從事莫羞貧對月題詩有幾人明朝人事隨日出
怳然一夢瑤臺客

與頓起孫勉泛舟探韻得未字

窓前堆梧桐牀下鳴絡緯佳人尺書到客子中夜喟朝來
一樽酒晤語聊自慰秋蠅已無聲霜蟹初有味當爲壯士
飲眦裂須磔褶勿作兒女懷坐念躡蛸畏山城亦何有一
笑瀉肝胃泛舟以娛君魚鼈多可餽縱爲十日飲未遽主
人費吾儕俱老矣耿耿知自貴寧能傍門戶啼笑雜猩猩
要將百篇詩一吐千丈氣蕭條歲行莫迨此霜雪未明朝
出城南遺迹觀楚魏西風迫吹帽金菊亂如沸願君勿言
歸輕別吾所諱

九日黃樓作

東坡詩鈔

三十五

去年重陽不可說南城夜半千漚發水穿城下作雷鳴泥
滿城頭飛雨滑黃花白酒無人問日暮歸來洗韉襪豈知
還復有今年把盞對花客一呷莫嫌酒薄紅粉陋終勝泥
中事斂鋪黃樓新成壁未乾清河已落霜初殺朝來白露
如細雨南山不見千尋剝樓前便作海茫茫樓下空聞櫓
鴉軋薄寒中人老可畏熱酒澆腸氣先壓煙消日出見漁
村遠水鱗鱗山巒巒詩人猛士雜龍虎坐客三十餘人楚
多知名之士舞吳歌亂鷓鴣一杯相屬君勿辭此境何殊泛清雲

九日次韻王鞏

我醉欲眠君罷休已教從事到青州鬣霜饒我三千丈詩
律輸君一百籌聞道郎君閉東閣且容老子上南樓相逢
不用忙歸去明日黃花蝶也愁

送頓起

客路相逢難爲樂，常不足臨行挽衫袖。更賞折殘菊，佳人亦何念。淒斷陽關曲，酒闌不忍去。其接一寸燭，留君終無窮。歸駕不免促，岱宗已在眼。一往繼前躅，天門四十里。夜看扶桑浴，回頭望彭城。大海浮一粟，故人在其下。塵土相逐蹴，惟有黃樓詩千古。配洪澳，頓有詩記黃樓本末。

次韻王鞏顏復同泛舟

沈郎清瘦不勝衣，邊老便便帶十圍。躑躅身輕山上走，謹呼船重醉中歸。舞腰似雪金釵落，談辯如雲玉麈麾。憶在錢塘正如此，回頭四十二年非。

與參寥師行園中得黃耳蕈

遣化何時取，衆香法筵齋鉢久。淒涼寒蔬病甲誰能採，落

東坡詩鈔

三十六

葉空畦，半已荒老楮。忽生黃耳菌，故人兼致白。牙薑蕭然放，筋東南去。又入春山筍蕨鄉。

百步洪

并序

王定國訪余於彭城，一日棹小舟與顏長道攜盼英卿三子游泗水。北上聖女山，南下百步洪，吹笛飲酒，乘月而歸。余時以事不得往，夜着羽衣，佇立於黃樓上，相視而笑。以爲李太白死世間無此樂三百餘年矣。定國旣去，逾月復與參寥師放舟洪下，追懷曩遊，已爲陳迹，喟然而嘆。

佳人未肯回秋波，幼輿欲語防飛梭。輕舟弄水買一笑，醉中蕩槳肩相磨。不似長安閭里俠，貂裘夜走燕脂坡。獨將詩句擬鮑謝，涉江其採秋江荷。不知詩中道何語，但覺兩

頗生微澗我時羽服黃樓上坐見織女初斜河歸來笛聲
滿山谷明月正照金叵羅奈何捨我入塵土擾擾毛羣欺
卧馳不念空齋老病叟退食誰與同委蛇時來洪上看遺
迹忍見屐齒青苔窠詩成不覺雙淚下悲吟相對惟羊何
欲遣佳人寄錦字夜寒手冷無人呵

夜過舒堯文戲作

先生堂前霜月苦弟子讀書喧兩廡推門入室書縱橫
蠟紙燈籠晃雲母先生骨清少眠卧長夜默坐數更鼓耐寒
石硯欲生水得火銅餅如過雨郎君欲出先自贊坐客斂
衽誰敢侮明朝阮籍過阿戎應作義之美懷祖

次韻王廷老退居見寄

接果移花看補籬腰鎌手斧不妨持上都新事長先到老
圃閑談未易欺釀酒閉門開社壻殺牛留客解耕縻何時
得見纖纖玉右手持盃左捧頤

東坡詩鈔

三十七

祈雪霧猪泉出城馬上作贈舒堯文

二年走吳越踏遍千里山朝隨白雲去莫與栖鴉還翩如
得木犴飛步誰能攀一爲符竹累坐老敲榜間此行亦何
事聊散腰脚頑浩蕩城西南亂山如玦環山下野人家桑
柘雜榛菅歲晏風日暖人牛相對閑薄雪不蓋土麥苗稀
可刪願君發豪句嘲詼破天慳

種松得徠字

其四在懷古堂其六在石經院

春風吹榆林亂英飛作堆荒園一雨過戢戢千萬栽青松
種不生百株望一枚一枚已有餘氣壓千畝槐野人易斗
粟云自魯徂徠魯人不知貴萬竈飛青煤束縛同一車胡

爲乎來哉泫然解其縛清泉洗浮埃枝傷葉尚困生意未
肯回山僧老無子養護如嬰孩坐待走龍蛇清陰滿南臺
孤根裂山石直幹排風雷我今百日客養此千歲材時去替不
百茯苓無消息雙髻日夜催古今一俛仰作詩寄餘哀

往在東武與人往反作粲字韻詩四首今黃魯直亦

次韻見寄復和答之

符堅破荊州止獲一人半中郎老不遇但喜識元歎我今
獨何幸文字厭奇玩又得天下才相從百憂散陰求我輩
人規作林泉伴寧當待垂老倉卒收一旦不見梁伯鸞空
對孟光案才難不其然婦女厠周亂世豈無作者於我如
旣盟獨喜誦君詩咸韶音節緩夜光一已多矧獲纍纍貫
相思君欲瘦不往我真儒吾儕眷微祿寒夜抱寸炭何時
定相過徑就我乎館飄然東南去江水清且渙相與訪名
山微言師忍粲

東坡詩鈔

三十八

送蜀人張師厚赴殿試

忘歸不覺髻毛斑好事鄉人尚往還斷嶺不遮西望眼送
君直過楚王山

罷徐州往南京馬上走筆寄子由

吏民莫扳援歌管莫悽咽吾生如寄耳寧獨爲此別別離
隨處有悲惱緣愛結而我本無恩此涕誰爲設紛紛等兒
戲鞭韉遭割截道邊雙石人幾見太守發有知當解笑撫
掌冠纓絕

父老何自來花枝裊長紅洗殘拜馬前請壽使君公前年
無使君魚鼈化兒童舉鞭謝父老正坐使君窮窮人命分

惡所向招灾凶水來非吾過去亦非吾功

贈惠山僧惠表

行遍天涯意未闌將心到處遣人安山中老宿依然在案上楞嚴已不看欹枕落花餘幾片閉門新竹自千竿客來茶罷空無有麈尾楊梅尚帶酸

與秦太虛參寥會于松江而關彥長徐安中適至分

韻得風字二首

吳越溪山興未窮又扶衰病過垂虹浮天自古東南水送客今朝西北風絕境自忘千里遠勝遊難復五人同舟師不會留連意擬看斜陽萬頃紅

二子緣詩老更窮人閒無處吐長虹平生睡足連江雨盡日舟橫摩岸風人笑年來三黜慣天教我輩一樽同知君

東坡詩鈔

三十九

欲寫長相憶更送銀盤尾鬣紅

送劉寺丞赴餘姚

中和堂後石楠樹與君對牀聽夜雨玉笙哀怨不逢人但見香煙橫碧縷謳吟思歸出無計坐想蟋蟀空房語明朝開鑣放觀潮豪氣正與潮爭怒銀山動地君不看獨愛清香生雪霧別來聚散如宿昔城郭空存鶴飛去我老人間萬事休君亦洗心從佛祖手香新寫法界觀眼淨不覩登伽女餘姚古縣亦何有龍井白泉甘勝乳千金買斷顧渚春似與越人降日注

李公擇過高郵見施大夫與孫莘老賞松詩憶與僕

去歲會于彭門折花饋筍故事作詩二十四韻見

戲依韻奉答亦以一戲公擇云爾

汝陽真人綉帽著紅槿纏頭三百萬不買一微哂共誇
青山峰曲盡花不墮當時謫仙人逸韻謝封吟詩成天一
笑萬象解寒窘驚開小桃杏不待雷發軫餘波尚涓滴乞
與居易植爾來誰復見前輩風流盡寂寞兩詩人殘紅對
櫻筍飢腸得一醉妙語傳不泯君來恨不與便復相牽引
我老心已灰空煩扇餘燼天遊照六鑿虛空掃充物懸知
色竟空那復嗜鳥吻蕭然一方丈居士老龐蘊散花從滿
祓不荅天女問故人猶故日怨句寫餘恨疑我此心在遮
防費欄楯應處已斃地折尾時一蠢云聞孟光賢未學處
仲忍開閣放出寄招應已足左右侍雲翼何時花月夜羊
酒謝不敏此生如幻耳戲語翫芻糧應同亡是公一對子
虛聽

東坡詩鈔

四十

乘舟過賈收水閣收不在見其子二首

愛酒陶元亮能詩張志和青山來水檻白雨滿漁蓑淚垢
添丁面貧低舉案蛾不知何所樂竟夕獨酣歌

嫋嫋風蒲亂猗猗水荇長小舟浮鴨綠大杓瀉鵝黃得意
詩酒社終身魚稻鄉樂哉無一事何處不清涼

泛舟城南會者五人分韻賦詩

紫蟹鱸魚賤如土得錢相付何曾數碧筩時作象鼻彎白
酒微帶荷心苦運肘風生看斫脰隨刀雪落驚飛縷不將
醉語作新詩飽食應慙腹如鼓

與胡祠部遊法華山

陂湖欲盡山爲界始見寒泉落高派道人未放泉出山曲
折虛堂瀉清快使君年老尚兒戲綠棹紅船舞澎湃一笑

翻杯水漲裙餘懼濯足波生隘長松攬天龍起立蒼藤倒
谷雪崩壞仰穿蒙密得清曠一覽震澤吁可怪誰云四萬
八千頃渺渺東盡日所驅歸塗十里盡風荷清唱一聲聞
露薤是日樂工有作此聲者嗟余少小慕真隱白髮青衫天所械忽
逢佳士與名山何異枯楊便馬疥君猶鸞鶴偶飄墮六翻
如雲豈長鍛不將新句紀茲遊恐負山中清淨債

又次前韻贈賈耘老

具區吞滅三州界浩浩湯湯納千派從來不著萬斛船一
輩漁舟恣奔快仙壇古洞不可到空聽餘瀾鳴湃湃今朝
偶上法華嶺縱觀始覺人寰隘山頭卧碣弔孤冢下有至
人僵不壞空餘白棘網秋蟲無復青蓮出幽怪事見本院碑我
來徙倚長松下欲掘茯苓親洗晒聞道山中富奇藥往往

東坡詩鈔

四十一

電芝雜葵薤詩人空腹待黃精三事只看長柄械杜子美詩云長
鑿種鑿白木柄我
生託子以為命
有小蟲葉
不甚為害今年大熟期一飽食葉微蟲真癘疥歲今
變春酒與子一洗尋常債

陳季常所畜朱陳村嫁娶圖

何年顧陸丹青手畫作朱陳嫁娶圖聞道一村惟兩姓不
將門戶買崔盧

我是朱陳舊使君勸耕曾入杏花村而今風物那堪畫縣
史催錢夜打門朱陳村在徐州蕭縣

初到黃州

自笑平生爲口忙老來事業轉荒唐長江遶郭知魚美好
竹連山覺筍香逐客不妨員外置詩人例作水曹郎只慙

無補絲毫事尚費官家壓酒囊

檢校官例折支多得退酒袋

定惠院寓居月夜偶出

幽人無事不出門，偶逐東風轉良夜。參差玉宇飛未末，繚繞香煙來月下。江雲有態清自媚，竹露無聲浩如瀉。已驚弱柳萬絲垂，尚有殘梅一枝亞。清詩獨吟還自和白，酒已盡誰能借不辭。青春忽忽過，但恐懽意年年謝。自知醉耳愛松風，會揀霜林結茅舍。浮浮大甌長炊玉，溜溜小槽如壓蔗。飲中真味老更濃，醉裏狂言醒可怕。但當謝客對妻子，倒冠落佩從嘲罵。

次韻前篇

去年花落徐州對月酣歌美清夜

去年徐州花下對月與張君厚王子忠兄弟飲酒作

今年黃州見花發小院閉門風露下萬事如花

東坡詩鈔

四十二

不可期餘年似酒那禁瀉憶昔還鄉沂巴峽落帆樊口

黃州前

高桅亞長江袞袞空自留白髮紛紛寧少借竟無五

岸

畝繼沮溺空有千篇陵鮑謝至今歸計負雲山未免孤衾

眠客舍少年辛苦真食蓼老景清閑如啖蔗飢寒未至且

安居憂患已空猶夢怕尋花踏月飲村酒免使醉歸官長

罵
寓居定惠院之東雜花滿山有海棠一株土人不知

貴也

江城地瘴蕃草木只有名花苦幽獨嫣然一笑竹籬間桃

李漫山總籠俗也知造物有深意故遣佳人在空谷自然

富貴出天姿不待金盤薦華屋朱唇得酒暈生臉翠袖卷

紗紅映肉林深霧暗曉光遲日暖風輕春睡足雨中有淚

亦悽愴月下無人更清淑先生食飽無一事散步逍遙自
捫腹不問人家與僧舍拄杖敲門看修竹忽逢絕艷照衰
朽歎息無言楮病目陋那何處得此花無乃好事移西蜀
寸根千里不易到銜子飛來定鴻鵠天涯流落俱可念爲
飲一樽歌此曲明朝酒醒還獨來雪落紛紛那忍觸

雨晴後步至四望亭下魚池上遂自乾明寺前東岡

上歸

雨過浮萍合蛙聲滿四鄰海棠真一夢梅子欲嘗新拄杖
閑挑菜鞦韆不見人慙慙木芍藥獨自殿餘春

杜沂遊武昌以酴醾花見餉

酴醾不爭春寂寞開最晚青蛟走玉骨羽蓋蒙珠幘不粧
艷已絕無風香自遠淒涼吳宮闕紅粉埋故苑至今微月
夜笙歌來絕嘯餘妍入此花千載尚清婉怪君呼不歸定
爲花所挽昨宵雷雨惡花盡君應返

東坡詩鈔

四十三

遷居臨皋亭

我生天地間一蟻寄大磨區區欲右行不救風輪左雖云
走仁義未免違寒餓劍米有危炊鉞鑊無穩坐豈無佳山
水借眼風雨過歸田不待老勇決凡幾箇幸茲廢棄餘疲
馬解鞍馱全家古江驛絕境天爲破飢貧相乘除未見可
弔賀澹然無憂樂苦語不成些

曉至巴河口迎子由

去年御史府舉動觸四壁幽斷百尺井仰天無一席隔墻
聞歌呼自恨計之失留詩不忍寫苦淚漬紙筆餘生復何
幸樂事有今日江流鏡面靜煙雨輕羃羃孤舟如鳧鷖點

破千頃碧聞君在磁湖欲見隔咫尺朝來好風色旗尾西北擲行當中流見笑眼青光溢此邦疑可老修竹帶泉石欲買柯氏林茲謀待君必

次韻答子由

平生弱羽寄衝風此去歸飛識所從好語似珠穿一一忘心如膜退重重山僧有味寧知子瀧吏無言只笑儂尚有讀書清淨業未容春睡敵千鍾

正月二十日往岐亭郡人潘古郭三人送余於女王

城東禪莊院

一本作代書寄桃山居士張聖可

十日春寒不出門不知江柳已搖村稍聞泱泱流水谷盡放青青沒沒痕數畝荒園留我往半甔濁酒待君溫去年今日關山路細雨梅花正斷魂

東坡詩鈔

四十四

東坡八首

并叙

余至黃二年日以困賈故人馬正卿哀予乏食爲於郡中請故營地數十畝使得躬耕其中地既久荒爲芟棘瓦礫之場而歲又大旱墾闢之勞筋力殆盡釋耒而歎乃作是詩自憇其勲庶幾來歲之入以忘其勞焉廢壘無人顧頽垣滿蓬蒿誰能拍筋力歲晚不償勞獨有孤旅人天窮無所逃端來拾瓦礫歲旱土不膏崎嶇草棘中欲刮一寸毛喟然釋耒歎我廩何時高

荒田雖浪莽高庫各有適下隰種秔秠東原蒔棗栗江南有蜀土桑果已許乞好竹不難栽但恐鞭橫逸飭須卜佳處規以安我室家童燒枯草走報暗井出一飽未敢期瓢飲已可必

白昔有微泉來從遠嶺背穿城過聚落流惡壯蓬艾去爲
柯氏陂十畝魚蝦會歲旱泉亦竭枯萍粘破塊昨夜南山
雲雨到一犁外法然尋故瀆知我理荒蕪泥芹有宿根一
寸嗟獨在雪芽何時動春鳩行可膾蜀人贊芹芽膾雞
種稻清明前樂事我能數毛空暗春澤鹹水聞好語蜀人
雨爲雨毛稻初生時分秧及初夏漸喜風葉舉月明看露
農夫相語稻鹹水矣上一珠垂縷秋來霜穗重顛倒相撐拄但聞哇瓏聞蛙
蛭如風雨蜀中稻熟時蛙蟪羣飛田新春便入甌玉粒照
筐管我久食官倉紅腐等泥土行當知此味口腹吾已許
良農惜地力幸此十年荒桑柘未及成一麥庶可望投種
未逾月覆塊已蒼蒼農夫告我言勿使苗葉昌君欲富餅
餌要須縱牛羊再拜謝苦言得飽不敢忘

東坡詩鈔

四十五

種稟期可剝種松期可斲事在十年外吾計亦已愁十年
何足道千載如風電舊聞李衡奴此策疑可學我有同舍
郎官居在滯岳李公遺我三寸柑照坐光卓犖百栽儻可
致當及春水渥想見竹籬間青黃垂屋角

潘子久不調沽酒江南村郭生本將種賣藥西市垣古生
亦好事恐是押牙孫家有十畝竹無時客叩門我窮交舊
絕三子獨見存從我於東坡勞餉同一餐可憐杜拾遺事
與朱阮論吾師卜子夏四海皆弟昆

馬生本窮士從我二十年日夜望我貴求分買山錢我今
反累生借耕輟茲田刮毛龜背上何時得成羶可憐馬生
癡至今誇我賢衆笑終不悔施一當獲千

姪安節遠來夜坐

心衰百改瘦崢嶸相見惟應識舊聲
永夜思家在何處殘年知汝遠來情
畏人默坐成癡鈍問舊驚呼半死生
夢斷酒醒山雨絕笑看飢鼠上燈檠

岐亭道上見梅花戲贈季常

蕙死蘭枯菊亦摧返魂香入嶺頭梅
數枝殘綠風吹盡一點芳心雀啞開
野店初嘗竹葉酒江雲欲落豆稽灰
行當更向欽頭見病起烏雲正作堆

杭州故人信至齊安

昨夜風月清夢到西湖上朝來聞好語
扣戶得吳餉輕圓白曬荔脆臘紅螺醬
更將西庵茶勸我洗江瘴故人情義
重說我必西向一年兩僕夫千里問無恙
相期結書社故人相約釀錢雇僕未一歲再至黃未怕供詩帳僕頃以詩得罪有司移杭取境內所留詩杭州俱數百首

東坡詩鈔

四十六

謂之還將夢魂去一夜到江漲

江漲杭州橋名

和王鞏三首次韻

君談陽朔山不作一錢直巖藏兩頭虺瘴落千仞翼雅宜
驅鬼放頗訝虞舜陟覽來已可畏覽鏡憂面黑况子三年
囚苦霧變飲食吉人終不死仰荷天地德我來黃岡下敵
枕江流碧江南武昌山向我如咫尺春蔬黃土軟凍筍蒼
崖折此行我累君乃反得安宅遙知丹穴近爲斲响嘍石
他年分刀圭名字挂仙籍

君許惠州丹砂

少年帶刀劍但識從軍樂老犬服犁鉏解佩付鎔鑠雖無
獻捷功會賜力田爵敲冰春擣紙刈葦秋織箔櫟林斬冬
炭竹鳴收夏籜四時俯有取一飽天所醉君生紈綺間欲
學非其脚左右玉纖纖束薪誰爲縛勿令聞此語翠黛頰

將惡笑我一間茆婦姑紛六鑿

君家玉臂貫銅青下客何時見目成勤把鈿黃記宮樣莫
教絃管作蠻聲薰衣漸歎衙香少擁髻遙憐夜語清記取
北歸攜過我南江風浪雪山傾

君自南江赴任不一過我

正月二十日與潘郭二生出郊尋春忽記去年是日

同至女王城作詩乃和前韻

東風未肯入東門走馬還尋去歲村人似秋鴻來有信事
如春夢了無痕江城白酒三杯醺野老蒼顏一笑溫已約
年年爲此會故人不用賦招魂

紅梅

怕愁貪睡獨開遲自恐冰容不入時故作小紅桃杏色尚
餘孤瘦雪霜姿寒心未肯隨春態酒暈無端上玉肌詩老

東坡詩鈔

四十七

不知梅格在更看綠葉與青枝

石曼卿紅梅詩云認桃無綠葉辨杏有青枝

二蟲

君不見水馬兒步步逆流水大江東流日千里此蟲耀耀
長在此君不見鷓鴣堆決起隨衝風隨風一去宿何許逆
風還落蓬蒿中二蟲愚智俱莫測江邊一笑無人識

寒食雨

春江欲入戶雨勢來不已小屋如漁舟濛濛水雲裏空庖
煮寒菜破竈燒濕葦那知是寒食但見烏銜紙君門深九
重墳墓在萬里也擬哭塗窮死灰吹不起

徐使君分新火

臨臬亭中一危坐三見清明改新火溝中枯木應笑人鑽
斫不然誰似我黃州使君憐久病分我五更紅一朶從來

破釜躍江魚，只有清詩嘲飯顆。起攜蠟炬遶空屋，欲事烹煎無一可。爲公分作無盡燈，照破十方昏暗鎖。

蜜酒歌 并叙

西蜀道士楊世昌善作蜜酒，絕醇醲。余既得其方，作此歌遺之。

真珠爲漿，玉爲醴。六月田夫汗流漉，不如春甕自生香。蜂爲耕耘，花作米。一日小沸，魚吐沫。二日眩轉，清光活。三日開甕，香滿城。映瀉銀餅，不須撥百錢。一斗濃，無聲甘露微。濁醲糊清君，不見南園採花蜂。似雨天教釀，酒醉先生先。生年來窮到骨，問人乞米，何曾得。世間萬事，真悠悠。蜜蜂大勝監河侯。

又一首答二猶子與王郎見和

東坡詩鈔

四十八

蒲苜苔炙青蒲爛，蒸鵝鴨，乃瓠壺。煮豆作乳脂，爲酥高燒。大燭斟蜜酒，貧家百物初。何有古來百巧出，窮人搜羅假。坐亂天真詩書，與我爲麴蘖。醞釀老夫成，糴紳質非文。是糶難久脫，冠還作扶犁叟。不如蜜酒無燠寒，冬不加甜夏不酸。老夫作詩殊少味，愛此三篇如酒美。封未已，可憐不知更有王郎子。

魚蠻子

江淮水爲田，舟楫爲室。居魚鰕，以爲糧。不耕自有餘，異哉魚蠻子。本非左袵徒，連排入江住。竹瓦三尺廬，於焉長子孫。戚施且侏儒，擘水取魴鯉。易如拾諸途，破釜不着鹽。雪鱗芼青蔬，一飽便甘寢。何異獺與狙，人間行路難。踏地出賦租，不如魚蠻子。駕浪浮空虛，空虛未可知。會當算舟車。

鬢子叩頭泣勿語桑大夫

弔李臺卿

并敘

李臺卿字明仲廬州人貌陋甚性介不羣而博學強記罕見其比好左氏有史學考正同異多所發明知天文律歷千載之日可坐數也軾謫居黃州臺卿爲麻城主簿始識之旣罷居于廬而曹光州演甫以書報其亡臺卿光州之妻黨也

我初未識君人以君爲笑垂頭若病鶴煙雨靈七竅嘆衣來過我危坐若持釣褚褰半面新醲蔑一語妙徐徐涉其淵極望不得微却觀元嫵媚士固難輕料看書眼如月鏤隙靡不照我老多遺忘得君如再少從橫通雜藝甚博且知要所恨言無文至老幽不耀其生世莫識已死誰復弔

作詩遺故人庶解俗子譙

東坡詩鈔

四十九

元脩菜

并敘

菜之美者有吾鄉之巢故人巢元脩嗜之余亦嗜之元脩云使孔北海見當復云吾家菜邪因謂之元脩菜余去鄉十有五年思而不可得元脩適自蜀來見余於黃乃作是詩使歸致其子而種之東坡之下云

彼美君家菜鋪田綠茸茸豆莢圓且小槐芽細而豐種之秋雨餘擢秀繁霜中欲花而未萼一一如青蟲是時青裙女採擷何忽忽烝之復湘之香色蔚其饜點酒下鹽豉縷橙茱薑葱那知雞與豚但恐放箸空春盡苗葉老耕翻煙雨叢潤隨甘澤化暖作青泥融始終不我負力與糞壤同我老忘家舍楚音變兒童此物獨嫵媚終年繫余胃若歸

致其子囊盛勿函封張騫移首蒞適用如葵菘馬援載薏
苡羅生等蒿蓬懸知東坡下堦鹵化千鍾長使齊安人指
此說兩翁

二月三日點燈會客

江上東風浪接天苦寒無賴破春妍試開雲夢羔兒酒快
寫錢塘藥玉船蠶市光陰非故國馬行燈火記當年冷煙
濕雪梅花在留待新春作上元

上巳日與二三子攜酒出游隨所見輒作數句明日

集之爲詩故詞無倫次

薄雲霏霏不成雨杖藜曉入千花塢柯丘海棠吾有詩獨
笑深林誰敢侮三杯卯酒人徑醉一枕春睡日亭午竹間
老人不讀書留我閉門誰教汝出簷藁積十圍大寫真素

東坡詩鈔

五十

壁千蛟舞東坡作塘今幾尺攜酒一勞農工苦却尋流水
出東門壞垣古塹花無主卧開桃李爲誰妍對立鴉鵲相
媚嫵開竝藉草勸行路不惜春衫汙泥土褰裳共過春草
亭扣門却入韓家圃轆轤繩斷井深碧鞦韆索挂人何所
映簾空復小桃枝乞漿不見唐門女南上古臺臨斷岸雪
陣翻空迷仰俯故人餽我玉葉羹火冷煙消誰爲煮崎嶇
束蘊下荒徑姪姪隔花聞好語更隨落景盡餘樽却傍孤
城得僧宇主人勸我洗足眠倒牀不復聞鐘鼓明朝門外
泥一尺始悟三更雨如許平生所向無一遂茲遊何事天
不阻固知我友不終窮豈弟君子神所予

南堂二首

他時雨夜困移牀坐厭愁聲點客腸一聽南堂新瓦響似

聞東塢小荷香

山家爲割千房蜜稚子新畦五畝蔬更有南堂堪著客不
憂門外故人車

次韻孔毅甫久旱已而甚雨三首

飢人忽夢飯甌溢夢中一飽百憂失只知夢飽本來空未
悟真飢定何物我生無田食破硯爾來硯枯磨不出去年
太歲空在酉傍舍壺漿不容乞今年旱勢復如此歲晚何
以黔吾突青天蕩蕩呼不聞况欲稽首號泥佛甕中蜴蜥
尤可笑跛跂脉脉何等秩陰陽有時雨有數民是天民天
自卹我雖窮苦不如人要亦自是民之一形容可似喪家
狗未肯再耳爭投骨倒冠落幘謝朋友獨與蚊雷共圭華
故人嗔我不開門君視我門誰肯屈可憐明月如潑水夜
半清光翻我室風從南來非雨候且爲疲人洗蒸鬱裹裳
一和快哉謠未暇飢寒念明日

東坡詩鈔

五十一

去年東坡拾瓦礫自種黃黍三百尺今年刈草蓋雪堂日
炙風吹面如墨平生懶惰今始悔老大勤農天所直沛然
例賜三尺雨造化無心况難測四方上下同一雲甘霖不

爲龍所隔俗有分龍日蓬蒿下濕迎曉未燈火新涼催夜織老
夫作罷得甘寢卧聽牆東人響屐奔流未已坑谷平折葦

枯荷恣漂溺腐儒匱糲支百年力耕不受衆目憐破陂漏
水不耐早人力未至求天全會當作塘徑千步橫斷西北

遮山泉四鄰相率助舉杵人人知我囊無錢明年共看決
渠雨飢飽在我寧關天誰能伴我田間飲醉倒惟有支頭

天公號令不再出十日愁霖併爲一君家有田水冒田我家無田憂入室不如西州楊道士萬里隨身惟兩膝沿流不惡滯亦佳一葉扁舟任漂突山芎麥麴都不用泥行露宿終無疾夜來飢腸如轉雷旅愁非酒不可開楊生自言識音律洞簫入手清且哀不須更待秋井榻見人白骨方銜杯

初秋寄子由

百川日夜逝物我相隨去惟有宿昔心依然守故處憶在遠驛閉門秋暑中藜藿對書史揮汗與子同西風忽淒厲萬葉穿戶牖子起尋袂衣感歎執我手朱顏不可恃此語君勿疑別離恐不免功名定難期當時已悽斷况此兩衰老失塗旣難追學道恨不早買田秋已議築室春當成雪堂風雨夜已作對牀聲

東坡詩鈔

五十二

和秦太虛梅花

西湖處士骨應槁只有此詩君壓倒東坡先生心已灰爲愛君詩被花惱多情立馬待黃昏殘雪消遲月出早江頭千樹春欲闌竹外一枝斜更好孤山山下醉眠處黠綴裙腰紛不掃萬里春隨逐客來十年花送佳人老去年花開我已病今年對花還草草不如風雨卷春歸收拾餘香還畀昊

過江夜行武昌山上聞黃州鼓角

清風弄水月銜山幽入夜渡吳王峴黃州鼓角亦多情送我南來不辭遠江南又聞出塞曲半雜江聲作悲健誰言萬方聲一槩鼉憤龍愁爲余變我記江邊枯柳樹未死相

逢真識面他年一葉沂江來還吹此曲相迎饒

將至筠先寄遲迺遠三猶子

露宿風餐六百里明朝飲馬南江水未見豐盈岸角兒先

逢玉雪王郎子時道逢王郎於建昌方北行也對牀欲作連夜語念汝還

須戴星起夜來夢見小於菟遠小名菟兒猶是髣髴垂兩耳憶

過濟南春未動三子出迎殘雪裏我時移守古河東酒肉

淋漓渾含喜而今憔悴一羸馬逆旅擔夫相汝爾出城見

我定驚嗟身健窮愁不須耻我為乃翁留十日掣電一歡

何足恃惟當火急作新詩一醉兩翁勝酒美

別子由兼別遲

知君念我欲別難我今此別非他日風裏楊花雖未定雨

中荷葉終不濕三年磨我費百書一見何止得雙壁願君

亦莫歎留滯六十小劫風雨疾

東坡詩鈔 五十三

岐亭五首

昨日雲陰重東風融雪汁遠林草木暗近舍煙火濕下有

隱君子嘯歌方自得知我犯寒來呼酒意頗急拊掌動鄰

里遠村捉鵝鴨房櫳鏘器聲蔬果照中罌久聞萋蒿美初

見新芽赤洗盞酌鵝黃磨刀削熊自須更我徑醉坐睡落

巾憤醒時夜向闌啣啣銅餅泣黃州豈云遠但恐朋友缺

我當安所主君亦無此客朝來靜庵中惟見蜂蠻集

我哀籃中蛤閉口護殘汁又哀網中魚開口吐微濕剝腸

彼交病過分我何得相逢未寒溫相勸此最急不見盧懷

慎烝壺似烝鴨坐客皆忍笑髡然發其暮不見王武子每

食刀機赤琉璃載烝豚中有人孔白盧公信寒陋衰髮得

滿幘武子雖豪華未死神已泣先生萬金壁護此一蟻缺
一年如一夢百歲真過客君無廢此篇嚴詩編杜集
君家蜂作窠歲歲添漆汁我身牛穿鼻卷舌聊自濕二年
三過君此行真得得愛君似劇孟叩門知緩急家有紅頰
兒能唱綠頭鳴行當隔簾見花霧輕罽罽爲我飯黃封親
拆官泥赤仍須煩素手自點葉家白樂哉無一事十年不
蓄幘閉門弄漆丁哇笑雜呱泣西方正苦戰誰補將帥缺
披圖見八陣合散更主客不須親戎行坐論教君集

酸酒如養湯甜酒如蜜汁三年黃州城飲酒但飲濕我如
更揀擇一醉豈易得幾息壓茆柴禁網日夜急西鄰推甕
盎醉倒猪與鴨君家大如掌破屋無遮罽何從得此酒冷
而妬君亦定應好事人千石供李白爲君三日醉蓬髮不

東坡詩鈔

五十四

暇幘夜澹欲逾垣卧想春甕泣君奴亦笑我髻齒行秃缺
三年已四至歲歲遭惡客人生幾兩屐莫厭頻來集
枯松強鑽膏槁竹欲漉汁兩窮相值遇相哀莫相濕不知
我與君交遊竟何得心法幸相語頭然未爲急願爲穿雲
鶴莫作將雛鳴我行及初夏煮酒映疏罽故鄉在何許西
望千山赤茲遊定安歸東泛萬頃白一歡寧復再起舞花
墮幘將行出苦語不用兒女泣吾非固多矣君豈無一缺
各念別時言閉戶謝眾客空堂淨掃地虛白道所集

龍尾硯歌

并引

余舊作鳳唼石硯銘其略云蘇子一見名鳳唼坐令龍
尾羞牛後已而求硯於歙歙人云子自有鳳唼何以此
爲蓋不能平也奉議郎方君彥德有龍尾大硯奇甚謂

余若能作詩少解前語者當奉餉乃作此詩

黃琮白琥天不惜顧恐貪夫死懷璧君看龍尾豈石材玉
德金聲寓於石與天作石來幾時與人作視初不辭詩成
鮑謝石何與筆落鍾王視不知錦茵玉匣俱塵垢擣練支
牀亦何有况嗔蘇子鳳珠銘戲語相嘲作牛後碧天照水
風吹雲明窓大几清無塵我生天地一閭物蘇子亦是支
離人僉言細語都不擇春蚓秋蛇隨意畫願從蘇子老東
坡仁者不用生分別

豆粥

君不見呼沱流澌車折軸公孫倉皇奉豆粥濕薪破竈自
煖衣飢寒頓解劉文叔又不見金谷敲冰草水春帳下烹
煎皆美人萍蓬豆粥不傳法咄嗟而辦石季倫干戈未解
身如寄聲色相纏心已醉身心顛倒自不知更識人間有
真味豈如江頭千頃雪色蘆葦簷出沒晨煙孤地碓春杭
光似玉沙餅煑豆軟如酥我老此身無着處賣書來問東
家住卧聽雞鳴粥熟時蓬頭曳履君家去

秦少游夢發殯而葬之者云是劉發之柩是歲發首

薦秦以詩賀之劉涇亦作因次其韻

君看三代士執雉本以殺身爲小補居官死職戰死綬夢
尸得官真古語五行勝已斯爲官官如草木吾如土仕而
未祿猶賓客待以純臣蓋非古餽焉曰獻稱寡君豈比公
卿相爾汝世衰道微士失已得喪悲懼反其故草袍蘆箬
相嫵媚飲食嬉游事羣聚曲江船舫月燈毬是兩舞殯而
歌墓看花走馬到東野餘子紛紛何足數二生年少兩豪

逸詩酒不知軒冕苦故令將仕夢發棺勸子勿爲官所腐
塗車芻靈皆假設著眼細看君勿誤時來聊復一飛鳴進
隱不須煩伍舉

金山夢中作

江東賈客木繇裘會散金山月滿樓夜半潮來風又熟臥
吹簫管到揚州

徐大正閑軒

水蠶不知寒火鼠不知暑知閑見閑地已覺非閑侶君看
東坡翁懶散誰比數形骸墮醉夢生事委塵土早眠不見
燈晚食或欺午卧看甍取盜坐視麥漂雨語希舌頰強行
少腰脚瘦五年黃州城不踏黃州鼓人言我閑客置此閑
處所問閑作何味如眼不自覩頗訝徐孝廉得閑能幾許
介子願奉使翁歸備文武應緣不耐閑名字挂庭宇我詩
爲閑作更得不閑語君如汗血駒轉盼略燕楚莫嫌鑿輅
重終勝鹽車苦

東坡詩鈔

五十六

次韻王定國南遷回見寄

土暈銅花蝕秋水要須悍石相礪砥十年水蘖戰膏梁萬
里煙波濯紈綺歸來詩思轉清激百丈空潭數魴鯉近將
桂浦擷蘭蓀不記槐堂收劍履却思庾嶺今何在史說彭
城真夢耳宋書彭越君知先竭是甘井我願得全如苦李
妄心不復九回腸至道終當三洗髓廣陵陽羨何足較只
有無何真我望余買田陽羨來詩樂全老子今禪伯張安道也
其壘掣電機鋒不容擬心通豈復問云何印可聊須答如
是相逢爲我話留滯桃花春漲孤舟起

泗州南山監倉蕭淵東軒二首

偶隨樵父採都梁南山名都梁山出都梁香故也竹屋松扉試乞漿但

見東軒堪隱几不知公子是監倉溪中亂石墻垣古山下
寒蔬七箸香我是江南舊遊客挂冠知有老蕭郎

北望飛塵苦晝霾洗心聊復寄東齋珍禽聲好猶思越野
橘香清未過淮有信微泉來遠嶺無心明月轉空階一官

倉庾真堪老坐看松根絡斷崖

泗州除夜雪中黃師是送酥酒

暮雪紛紛投碎米春流咽咽走黃沙舊遊似夢徒能說逐
客如僧豈有家冷視欲書先自凍孤燈何事獨成花使君
半夜分酥酒驚起妻孥一笑譁

正月一日雪中過淮謁客回作

東坡詩鈔

五十七

攢眉有底恨得句不妨清霽霧開寒谷飢鴉舞雪城橋聲
春市散塔影莫淮平不用殘燈火船窓夜自明

孫莘老寄墨四首

徂徠無老松易水無良工珍材取樂浪妙手惟潘翁潘翁作墨

龍尾魚胞熟萬杵犀角盤雙龍墨成不敢用進入蓬萊

宮蓬萊春晝永三殿明房櫳金箋灑飛白瑞霧縈長虹遙

憐醉常侍一笑開天容

谿石琢馬肝剡藤開玉版噓噓雲霧出奕奕龍蛇結此中

有何好秀色紛滿眼故人歸天祿古漆窺蠹簡隄麋給尚

方老手擅編刻分餘幸見及流落一歎赧

我貧如飢鼠長夜空敲齧瓦池研窳煉葦管書柿葉近者

唐夫子遠致烏玉玦唐林夫寄張墨半丸先生又繼之圭璧爛箱

篋清窓洗硯坐，虵蚓稍蟠結。便有好事人，敲門求醉帖。
吾窮本坐詩，久服朋友戒。五年江湖上，開口洗殘債。今來
復稍稍快，癢如爬疥。先生不譏訶，又復寄詩械。幽光發奇
息，黠黠出荒怪。詩成一自笑，故疾逢鰕蟹。

和人見贈

只寫東坡不著名，此身已是一長亭。壯心無復春流起，衰
鬢從交病葉零。知有雪兒供筆硯，應嗤電婦洗盆鉚。回來
索酒公應厭，京口新傳作客經。

寄蘄箏與蒲傳正

蘭溪美箭不成笛，離離玉筋排霜春。千溝萬縷自生風，入
手未開先慘慄。公家列屋閑蛾眉，簾不動花陰移霧帳。
銀牀初破睡牙籤，玉局坐彈碁東坡病瘦長。羈旅凍卧飢
吟似飢鼠，倚賴春風洗破衾。一夜雪寒披故絮，火冷燈青
誰復知孤舟兒女自憂吟。皇天何時反炎燠，愧此八尺黃
琉璃。願公淨掃清香閣，卧聽風濤聲滿榻。習習還從兩腋
生，請公乘此朝開闢。

贈眼醫王生彥若

鍼頭如麥芒，氣出如車軸。開闢絡脉中，性命寄毫粟。而况
清淨眼內景，含天燭琉璃。貯沆瀣，輕脆不任觸。而子於其
間，來往施鋒鏃。笑談紛自若，觀者頸爲縮。運鍼如運斤，去
翳如拆屋。常疑子善幻，他技雜符祝。子言吾有道，此理君
未矚。形骸一座垢，貴賤兩草木。世人方重外，妄見尾與玉。
而我初不知，刺眼如刺肉。君看目與翳，是翳要非目。目翳
苟二物，易分如麥菽。寧聞老農夫，去草更傷穀。鼻端有餘

地肝膽分楚蜀吾於五輪間蕩蕩見空曲如行九軌道並
驅無擊轂空花誰開落明月自朏胸請問樂全堂忘年老
尊宿彥若樂全先生門下醫也

贈葛葦

竹椽茆屋半摧頽宵向蜂窠寄此生長恐波頭卷室去欲
將船尾載君行小詩試擬孟東野大草閑臨張伯英消遣
百年須底物故應憐我不歸耕

海市并敘

予聞登州海市舊矣父老云常出於春夏今歲晚不復
見矣予到官五日而去以不見爲恨禱於海神廣德王
之廟明日見焉乃作此詩

東方雲海空復空羣仙出沒空明中蕩搖浮世生萬象豈
有貝闕藏珠宮心知所見嗜幻影敢以耳目煩神工歲寒

東坡詩鈔

五十九

水冷天地閉爲我起蜚鞭魚龍重樓翠阜出霜曉異事驚
倒百歲翁人間所得容力取世外無物誰爲雄率然有請
不我拒信我人厄非天窮潮陽太守南遷歸喜見石廩堆
祝融自言正直動山鬼豈知造物哀龍鍾信眉一笑豈易
得神之報汝亦已豐斜陽萬里孤鳥沒但見碧海磨青銅
新詩綺語亦安用相與變滅隨東風

次韻王定國得穎倅

滔滔四海我知津每愧先生值杖芸自少多言晚闢道從
今閉口不論文灑翻白獸樽中酒歸煮青泥坊底芹要識
老僧無盡處淋前牛蟻不曾聞

次韻王震

攜文過我治平間，霧豹當時始一斑。聞道吹噓借餘論，故
教流落得生還。清篇帶月來霜夜，妙語先春發病顏。詩酒
暮年猶足用，竹林高會許時攀。

惠崇春江曉景

竹外桃花三兩枝，春江水暖鴨先知。萋萋滿地蘆芽短，正
是河豚欲上時。

送戴蒙赴成都玉局觀將老焉

拾遺被酒行歌處，野梅官柳西郊路。聞道華陽版籍中，至
今尚有城南柱。我欲歸尋萬里橋，水花風葉暮蕭蕭。芋魁
徑尺誰能盡，燈木三年已足燒。百歲風狂定，何有羨君今
作峩眉叟。縱未家生執戟郎，也應世出埋輪守。莫欺老病
未歸身，玉局他年第幾人。會待子猷清興發，還須雪夜去

尋君

送陳睦知潭州

華清縹渺浮高棟，上有纈林藏石甕。一杯此地初識君，千
巖夜上同飛鞚。君時年少面如玉，一飲百觚嫌未痛。白鹿
泉頭山月出，寒光潑眼如流汞。朝元閣上酒醒時，卧聽風
鑿鳴鐵鳳。舊遊空在人何處，二十三年真一夢。我得生還
雪鬢滿，君亦老嫌金帶重。有如社燕與秋鴻，相逢未穩還
相送。洞庭青草渺無際，天柱紫葢森欲動。湖南萬古一長
嗟，付與騷人發嘲弄。

送賈訥倅眉

老翁山下玉淵回，手植青松三萬栽。父老得書知我在，小
軒臨水爲君開。試看一一龍蛇活，更聽蕭蕭風雨哀。便與

甘棠同不翦蒼髯白甲待歸來先君墓于慕山之名老翁泉流許
爲一往感歎之深故及

杜介送魚

新年已賜黃封酒舊老仍分頰尾魚陋巷關門負朝日小
園除雪得春蔬病妻起斫銀絲膾稚子譚尋尺素書醉眼
矇矓覓歸路松江煙雨晚疎疎

武昌西山黃敘

嘉祐中翰林學士承旨邵公聖求爲武昌令常遊寒溪
西山山中人至今能言之賦謫居黃岡與武昌相望亦
常往來溪山間元祐元年十一月二十九日考試館職
與聖求會宿玉堂偶語舊事聖求嘗作元次山窪樽銘
刻之巖石因爲此詩請聖求同賦當以遺邑人使刻之

銘劍

東坡詩鈔

六十一

春江淥漲蒲萄醅武昌官柳知誰栽憶從樊口載春酒步
上西山尋野梅西山一上十五里風駕兩掖飛崔嵬同遊
困卧九曲嶺褰衣獨到吳王臺中原北望在何許但見落
日低黃埃歸來解劍亭前路蒼崖半入雲濤雅浪翁醉處
今尚在石曰杯飲無樽壘爾來古意誰復嗣公有妙語留
山隈至今好事除草棘常恐野火燒蒼苔當時相望不可
見玉堂正對金鑾開豈知自首同夜直卧看椽燭高花摧
江邊曉夢忽驚斷銅環玉鎖鳴春雷山人帳空猿鶴怨江
湖水生鴻雁來請公作詩寄父老往和萬壑松風哀

次韻劉貢父獨直省中

明窓畏日曉先敞高柳鳴蜩午更喧筆老新詩疑有物心

空客疾本無根隔牆我亦眠風榻上馬君先瑣月軒共喜
早歸三伏近解衣盤礴亦君恩

書李世南所畫秋景

野水參差落漲痕疎林欹倒出霜根扁舟一棹歸何處家
在江南黃葉村

人間斤斧日創夷誰見龍蛇百尺姿不是溪山曾獨往何
人解作挂猿枝

和子由除夜元日省宿致齋二首

江淮流落豈關天禁省相望亦偶然等是新年未相見此
身應坐不歸田
當年踏月走東風坐看春闈鎖醉翁白髮門生幾人在却
將新句調兒童

東坡詩鈔

六十二

慶源宣義王丈以累舉得官爲洪雅主簿雅州戶掾
遇吏民如家人人安樂之旣謝事居眉之青神瑞
草橋放懷自得有書來求紅帶旣以遺之且作詩
爲戲請黃魯直學士秦少游賢良各爲賦一首爲

老人光華

青衫半作霜葉枯遇民如兒吏如奴吏民莫作官長看我
是識字耕田夫妻啼兒號刺史怒時有野人來挽鬚拂衣
自注下下考芋魁飯豆豉豈無歸來瑞草橋邊路獨遊還
佩平生壺慈母巖前自喚渡青衣江上人爭扶今年蠶市
數州集中有遺民懷袴襦邑中之黔相指似白髯紅帶老
不癯我欲西歸下鄰舍隔牆拊掌容歌呼不學山王乘駟
馬回頭空指黃公廬

書林次中所得李伯時歸去來陽關二圖後二首
不見何堪唱渭城舊人空數米嘉榮龍眠獨識慙處畫
出陽關意外聲

兩本新圖寶墨香樽前獨唱小秦王爲君翻作歸來引不
學陽關空斷腸

次前韻再送周正孺

東川得望郎坐與西爭重高風傾石室舊學鄙文冢蜀人
安使君所至野不聳竹馬迎細侯大錢送劉寵遙知句谿
路老穉相扶擁看書古叢祠百怪朝幽拱牛頭與兜率雲
木蔚堆壠醉鄉追舊遊筆陣賈餘勇聊將詩酒樂一掃簿
書冗西風吹好句珠玉本無踵

書王定國所藏烟江疊嶂圖

王晉卿畫

東坡詩鈔

六十三

江上愁心千疊山浮空積翠如雲煙山耶雲耶遠莫知煙
空雲散山依然但見兩岸蒼蒼暗絕谷中有百道飛來泉
縈林絡石隱復見下赴谷口爲奔川川平山開林麓斷小
橋野店依山前行人稍渡喬木外漁舟一葉江吞天使君
何從得此本點綴毫末分清妍不知人間何處有此境徑
欲往置二頃田君不見武昌樊口幽絕處東坡先生留五
年春風搖江天漠漠暮雲卷雨山始娟丹楓翻鴉伴水宿
長松落雪驚醉眠桃花流水在入世武陵豈必皆神仙江
上清空我塵土雖有去路尋無緣還君此畫三歎息山中
故人應有招我歸來篇

六年正月二十日復出東門仍用前韻

亂山環合水侵門身在淮南盡處村五畝漸成終老計九

重新掃舊巢，痕豈惟見慣。沙鷗熟已覺，來多釣石温。長與東風約，今日暗香先返玉梅魂。

興龍節侍宴前一日微雪與子由同訪王定國小飲清虛堂定國出數詩皆佳而五言尤奇子由又言昔與孫巨源同過定國感念存沒悲歎久之夜歸稍醒各賦一篇明日朝中以示定國也

天風淅淅飛玉沙，詔恩歸沐休早衙。遙知清虛堂裏雪，正似蒼荀林中花。出門自笑無所詣，呼酒持勸惟君家。踏冰凌兢戰疲馬，扣門剝啄驚寒鴉。羨君五字入詩律，欲與六出爭天葩。頭風已倩檄手愈，背癢恰得仙爪爬。銀餅瀉油浮蟻酒，紫盃鋪粟盤龍茶。幅巾起作鵝鵠舞，疊鼓誰摻漁陽撾。九衢燈火雜夢寐，十年聚散空咨嗟。明朝握手殿門外，共看銀闕暎晨霞。

東坡詩鈔

六十四

王晉卿作煙江疊嶂圖僕賦詩十四韻晉卿和之語特奇麗因復次韻不獨紀其詩畫之美亦爲道其出處契濶之故而終之以不忘在莒之戒亦朋友忠愛之義也

山中舉頭望日邊，長安不見空雲烟。歸來長安望山上，時移事改應潛然。管絃去盡賓客散，惟有馬埒編金泉。渥洼故自千里足，要飽風雪輕山川。屈居華屋嚼棗脯，十年俯仰龍旂前。却因病瘦出奇骨，鹽車之厄寧非天。風流文采磨不盡，水墨自與詩爭妍。畫山何必山中人，田歌自古非知田。鄭虔三絕君有二，筆勢挽回三百年。欲將巖谷亂窈窕，眉峰脩嫵誇連娟。人間何有春一夢，此身將老蠶三眠。

山中幽絕不可久要作平地家居仙能令水石長在眼非
君好我當誰緣願君終不忘在莒樂時更賦囚山篇

柳子厚有

囚山賦

夜直玉堂攜李之儀端叔詩百餘首讀至夜半書其

後

玉堂清冷不成眠伴直難呼孟浩然暫借好詩消永夜每
逢佳處輒添禪愁侵硯滴初含凍喜入燈花燄鬪妍寄語
君家小兒子他時此句一時編

再和劉貢父春日賜幡勝

與君流落偶還朝過眼紛綸七葉貂莫笑華顛飄彩勝幾
人黃壤隔青霄行吟未許窮騷雅坐嘯猶能出教條記取
明年江上郡五更春枕夢春韶

東坡詩鈔

六十五

去杭十五年復遊西湖用歐陽察判韻

我識南屏金鯽魚重來拊檻散齋餘還從舊社得心印似
省前生覓手書葑合平湖久蕪漫人經豐歲尚凋疎誰憐
寂寞高常侍老去狂歌憶孟諸

與莫同年雨中飲湖上

到處相逢是偶然夢中相對各華顛還來一醉西湖雨不
見跳珠十五年

座上借韻送竒鼠軍通判葉朝奉

雲間踏白看纏旗莫忘西湖把酒時夢裏吳山連越嶠樽
前羗婦雜 夕烽過後人初醉春鴈來時雪未滋爲問

從軍真樂否書來粗遣故人知

次韻詹適宣德小飲異亭

君方夢謫仙

來詩記李
白郎官湖

我亦弔文園江上同三黜天涯又
一樽濤雷殷白晝梅雪耿黃昏歸去多情雨應隨御史軒

詹爲御史主簿

東川清絲寄魯冀州戲贈

鵝溪清絲清如水上有千歲交枝藤藤生谷底飽風雪歲
晚忽作龍蛇升嗟我雖爲老侍從骨寒只愛布與繒牀頭
錦衾未還客坐覺芒刺在背膺豈如髯卿晚乃貴福祿正
似川方增醉中倒着紫綺裘下有半臂出縹綾封題不敢
妄裁翦刀尺自有佳人能遙知千騎出清曉積雪未放游
塵與白須紅帶柳絲下老弱空巷人相登但放奇紋出領
袖吾髯雖老無人憎

次韻劉景文周次元寒食同游西湖

東坡詩鈔

六十六

絮飛春減不成年老境同乘下瀨船藍尾忽驚新火後
樂
寒食詩云二盃盞
尾酒一碟膠牙錫
遂頭要及浣花前
成都太守自正月二
日出遊至四月十九
日止山西老將詩無敵洛下書生語更妍共向北山尋
二士畫甍鼉鼓聒清眠

次韻林子中王彥祖唱酬

早知身寄一漚中晚節尤驚落木風

近聞莘老公擇
皆逝故有此句

昨夢

已論三世事歲寒猶喜五人同

軾與子中彥祖子敦完大
同試舉人景德寺今皆健

雨餘北固山圍座春盡西湖水映空差勝四明狂監在更
將老眼犯塵紅

次韻曹輔寄壺源試焙新芽

仙山靈雨濕行雲洗遍香肌粉未勻明日來投玉川子清
風吹破武林春要知玉雪心腸好不是膏油首面新戲作

